

御定全唐詩錄

土岐文庫
文庫17
W65
20



全唐詩集卷之五十二 權德輿



010185189363

文庫 17
W 65
20



御定全唐詩錄卷第五十七

禮部侍郎臣徐倬翰林院侍讀學士臣徐元正奉

旨校刊

權德輿

德輿字載之畧陽人起家河南幕府德宗聞其名
召為左補闕知制誥中書舍人歷禮部侍郎三典
貢舉元和五年以禮部尚書同平章事罷守本官
後為東都留守又鎮興元卒贈左僕射謚文德輿
三歲能變四聲四歲能詩賦嗜讀書無寸景暫倦
其文雅正而弘博羽儀朝行三十載醞藉風流為
時稱嚮



古體詩

古意

家人強進酒酒復能忘情持杯未飲時衆感紛已盈明
月照我傍庭柯振秋聲空階白露下枕席涼風生所思
萬里餘水潤山縱橫佳期憑夢想未晚愁雞鳴願得一
心人當年歡樂并長筵映玉俎素指彈秦箏曼睇呈巧
笑惠音激淒清此願良未果永懷空如醒

與沈十九拾遺同遊棲霞寺上方夜於亮上人院

會宿

攝山標勝絕暇日諧相矚縈紆松路深繚繞雲巖曲重
樓回樹杪古像鑿山腹人遠水木清地深蘭桂馥層臺

聳金碧絕頂摩淨綠下界誠可悲南朝紛在目焚香入
古殿待月出溪竹稍覺天籟清自傷人世促宗雷此相
遇偃放隨所欲清論月輪低閒吟茗花熟一生如土梗
萬慮相桎梏永願事潛師窮年此棲宿

月夜江行

扣舷不能寐浩露清衣襟彌傷孤舟夜遠結萬里心幽
興惜瑤草素懷寄鳴琴三奏月初上寂寥寒江深

豐城劔池驛

龍劔昔未發泥沙相晦藏向非張茂先孰辯斗牛光神
物不自達聖賢亦彷徨我行豐城野慷慨心內傷

晚渡楊子江卻寄江南親故

返照滿寒流輕舟任搖漾支頤見千里煙景非一狀遠
岫有無中片帆風水上天清去鳥滅浦迴寒沙漲樹晚
疊秋嵐江空翻宿浪曾中千萬慮對此一清曠回首碧
雲深佳人不可望

早發杭州泛富春江寄陸三十六公祐

候曉起徒馭春江多好風白波連青雲蕩漾晨光中四
望浩無際沈憂將此同未離奔走途但恐成悲翁俯視
觸餌鱗仰目凌霄鴻纓塵日已厚心累何時空泛泛此
人世所向皆樊籠唯應杯中物醒醉爲窮通故人元圃
姿瓊樹分青葱終當北山去共結蘭桂叢

古樂府

光風淡蕩百花吐樓上朝朝學歌舞身年二八壻侍中
幼妹承恩兄尚主綠窗珠箔繡鴛鴦侍婢先焚百和香
鶯曉日出不知曙寂寂羅幃春夢長

妾薄命篇

昔住邯鄲年尚少只是嬌羞弄花鳥青樓碧紗大道邊
綠楊日暮風裊裊嬋娟玉貌二八餘自矜顏色花不如
麗質全勝秦氏女藁砧寧用專城居歲去年來年漸長
青蛾紅粉全堪賞玉樓珠箔但閑居南陌東城詎來往
韶光日日看漸遲標梅旣落行有時寧知燕趙娉婷子
翻嫁幽并遊俠兒年年結束青絲騎出門一去何時至
秋月空懸翡翠簾春幃嬾卧鴛鴦被沙塞經時不寄書

深閨愁獨意何如花前拭淚情無限月下調絃恨有餘
離別苦多相見少洞房愁夢何時曉閑看雙燕淚霏霏
靜對空牀魂悄悄鏡裏紅顏不自禁陌頭香騎動春心
為問佳期早晚是人人總解有黃金

秋閨月

三五二八光如練海上天涯人共見不知何處玉樓前
乍入深閨玳瑁筵露濃香徑和愁坐風動羅帷照獨眠
初卷珠簾看不足斜抱箜篌未成曲稍映妝臺臨綺窗
遙知不語淚雙雙此時愁望知何極萬里秋天同一色
靄靄遙分陌上光迢迢對此閨中憶早晚歸來歡燕同
可憐歌吹月明中此夜不堪腸斷絕願隨流影到遼東

近體詩

長相思

少小別潘郎嬌羞倚畫堂有時裁尺素無事約殘黃鵲
語臨妝鏡花飛落繡牀相思不解說明月照空房

送映師歸本寺

還歸柳寺去遠遠出人羣苔甃桐花落山窗桂樹薰引
泉通絕澗放鶴入孤雲幸許宗雷到清談不易聞

送王鍊師赴王屋洞

稔歲在芝田歸程入洞天白雲辭上國青鳥會羣仙自
以碁消日寧資藥駐年相看話離別風馭忽泠然

晚秋陪崔閣老張秘監閣老苗考功同遊昊天觀

時楊閣老新直未滿以詩見寄斐然酬和有愧
蕪音

方駕遊何許仙源去似歸縈迴留勝賞瀟灑出塵機
泛菊賢人至燒丹姹女飛步虛清晚籟隱几吸晨輝
竹徑琅玕合芝田沆瀣晞銀鈎三洞字瑤笥六銖衣
麗句翻紅藥佳期限紫微徒然一相望郢曲和應稀

送工部張曹長大夫奉使西蕃

殊鄰覆露同奉使小司空西候車徒出南臺節印雄
吊詞將渥命導譯暢皇風故地山河在新恩玉帛通
塞雲凝廢壘關月照驚蓬青史書歸日翻輕五利功

酬裴傑秀才新櫻桃

新果真瓊液來應宴紫蘭圓疑竊龍頷色已奪雞冠
遠火微微辨殘星隱隱看茂先知味易曼倩恨偷難
忍用烹騂酪從將翫玉盤流年如可駐何必九華丹

田家即事

閒卧藜牀對落暉翛然便覺世情非漠漠稻花資旅
食青青荷葉製儒衣山僧相勸期中飯漁父同遊或
夜歸待學尚平婚嫁畢渚煙溪月共忘機

和司門殷負外早秋省中直夜寄荆南衛端公

共嗟王粲滯荊州才子為郎憶舊遊涼夜偏宜粉署
直清言遠待玉人酬風生北渚煙波濶露下南宮星
漢秋早晚得為同舍侶知君兩地結離憂

待漏假寐夢歸江東舊居因寄惠閣黎茅處士
十年江浦卧郊園閒夜分明結夢魂舍下煙蘿通古寺
湖中雲雨到前軒南宗長老知心法東郭先生識化源
覺後忽聞清漏曉又隨簪佩入君門

送張閣老中丞持節冊吊回鵲

旌旆翩翩擁漢官君行當得遠人歡分職南臺知禮重
綴書東觀見才難金章玉節鳴騶遠白草黃雲出塞寒
欲散別離唯有酒暫煩賓從駐征鞍

玉臺體十首

隱映羅衫薄輕盈玉腕圓相逢不肖語微笑畫屏前
知向遼東去由來幾許愁破顏君莫怪嬌小不禁羞

樓上吹簫罷閨中刺繡闌佳期不可見盡日淚潺潺
睡足珊瑚枕魂銷玳瑁牀羅衣不忍著羞見繡鴛鴦
君去期花時花時君不至簷前雙燕飛落妾相思淚
空閨滅燭夜羅幌獨眠時淚盡腸欲斷心知人不知
秋風一夜至吹盡後庭花莫作經時別西鄰是宋家
獨自披衣坐更深月露寒隔簾腸欲斷爭敢下階看
昨夜裙帶解今朝蟾子飛鉛華不可棄莫是橐砧歸
萬里行人至深閨夜未眠雙眉燈下掃不待鏡臺前

敷水驛

空見水名敷秦樓昔事無臨風駐征驛聊復捋髭鬚

玉臺體

人言錄卷第五
六
嬋娟二八正嬌羞日暮相逢南陌頭試問佳期不宵道
落花深處指青樓

雜興

琥珀尊開月映簾調絃理曲指纖纖含羞歛態勸君住
更奏新聲刮骨鹽

巫山雲雨洛川神珠襪香腰穩稱身惆悵妝成君不見
含情起立問傷人

舟行夜泊

蕭蕭落葉送殘秋寂莫寒波急暝流今夜不知何處泊
斷猿晴月引孤舟

戲贈蘇九

白首書窗成鉅儒不知簪組遍屠沽勸君莫問長安路
且讀魯山于菀于

贈天竺靈隱二寺主

石路泉流兩寺分尋常鐘磬隔山聞山僧半在中峯住
共占清猿與白雲

太常寺宿齋有寄

轉枕挑燈候曉雞想君應歎太常妻長年多病偏相憶
不遣歸時醉似泥

武元衡

元衡字伯蒼河南緱氏人祖平一有名舉進士憲
宗時拜門下侍郎同中書門下平章事後詔為劍

南節度使八年召還秉政淮蔡用兵王承宗上疏請赦吳元濟使人白事中書悖慢不恭元衡叱去承宗怨數上章誣詆未幾入朝出靖安里第夜漏未盡為賊所害

元衡善為五言詩好事者傳之往往被於管絃嘗夏夜作詩云夜久喧暫息池臺惟月明無因駐清景日出事還生明日遇害初元和八年元衡自蜀再輔政時太微犯上相歷執法占者言今之三相皆不利始輕末重月餘李絳以足疾免明年十月李吉甫以暴疾卒至是元衡為盜所害年五十八始元衡與吉甫齊年又同為宰相及出鎮分領揚

益及吉甫再入元衡亦還吉甫先一年以元衡生月卒元衡後一年以吉甫生月卒吉凶之數若符會焉先是長安謠曰打麥麥打三三三既而旋其裏曰舞了也解者謂打麥者打麥時也麥打者謂暗中突擊也三三三謂六月三日也舞了也謂元衡之卒也

元衡卒劉禹錫作佳人怨二章云寶馬鳴珂踏曉塵魚文匕首犯華茵適來行哭里門外昨夜華堂歌舞人又云秉燭朝天遂不回路人彈指望高臺墻東便是傷心地夜夜秋螢飛去來

晁公武云唐世工詩宦達者高適宦達工詩者元

衡

古體詩

獨不見

荆門一柱觀楚國三休殿環珮儼神仙輝光生顧盼春
風細胥舞明月高堂宴夢澤水連雲渚宮花似霰俄驚
白日晚始悟炎涼變別鳧異波濤離鴻分海縣南北斷
相聞嘆嗟獨不見

旬假西亭寄熊郎中

旬休屏戎事涼雨北窗眠一夜江城夢萬里繞山川草
木散幽氣池塘鳴早蟬妍芳落春後旅思生秋前紅槿
燦庭艷綠蒲繁渚煙行歌獨酌謠坐撥朱絲絃哀玉不

可扣華觴徒湛然聞君東林卧郡閣曠周旋酬對龍象
侶灌注清泠泉如何無礙智猶苦病纏牽

晨興寄贈竇使君

江陵歲方晏晨起盼庭柯白露傷紅葉清風斷綠蘿狗
時真氣索念遠幽懷多夙昔東山意縱橫南浦波有美
嬋娟子百慮攢雙蛾絨情鬱不舒幽竹自駢羅為子歌
寒苦旨酒朱顏酡世事浮雲變功名將奈何

秋日對酒

行年過始衰秋至獨先悲事往悻神魄感深滋涕洟百
慮紛然在一醉兀無思寶瑟拂塵匣徽音凝朱絲幽圃
蕙蘭氣煙窗松桂姿我乏濟時畧杖節撫坤維山川大

兵後牢落空城池驚沙猶振野綠草生荒陂物變風雨
順人懷天地慈春耕俟秋戰戎馬去封陲波瀾暗超忽
堅白亦磷緇客有自嵩穎重徵栖隱期丹訣學仙晚白
雲歸谷遲君恩不可報霜露繞南枝

送唐次

都門去馬嘶灞水春流淺青槐驛路長白日離尊晚望
望煙景微草色行人遠

望夫石

佳人望夫處苔蘚封孤石萬里水連天巴江暮雲碧湘
妃泣下竹成斑子規夜啼江樹白

近體詩

西亭早秋送徐負外

鼎鉉辭台座麾幢領益州曲池連月曉橫角滿城秋有
美皇華使曾同白社遊今來重相見偏覺艷歌愁

送柳郎中裴起居

沱江水綠波喧鳥去喬柯南浦別離處東風蘭杜多長
亭春婉婉層漢路蹉跎會有歸朝日班超奈老何

八月十五日酬從兄常望月有懷

坐愛圓景滿况茲秋夜長寒光生露草夕韻出風篁地
遠驚金奏天高失雁行如何北樓望不得共池塘

春日與諸公汎舟

千里雪山開沱江春水來駐帆雲縹緲吹管鶴徘徊身

外流年駛樽前落景催不應歸棹遠明月在高臺
同洛陽諸公餞盧起居

蕭條寒日晏悽慘別魂驚寶瑟無聲怨金囊故贈輕赤
墀方載筆油幕尚言兵暮宿青泥驛煩君淚滿纓

江上寄隱者

歸舟不計程江月屢虧盈靄靄滄波路悠悠離別情兼
葭連水國輦鼓近梁城却憶沿江叟汀洲春草生

送嚴紳遊蘭溪

剡嶺窮邊海君遊到嶺西暮雲秋水濶寒雨夜猿啼地
僻秦人少山多越路迷蕭蕭驅匹馬何處是蘭溪

秋思

秋空浩煙霧風柳怨寒蛩機杼夜聲切蕙蘭芳意消美
人湘水曲桂楫洞庭遙常恐時光謝蹉跎紅艷凋

夏日別盧太卿

漢水清且廣江波渺復深葉舟煙雨夜之子別離心汀
草結春怨山雲連暝陰年年南北淚今古共沾襟

春夜與諸公同宴呈陸三十四郎中

南國宴佳賓交情老倍親月慙紅燭淚花笑白頭人寶
瑟常餘怨瓊枝不讓春更聞歌子夜桃李艷妝新

長安春望

宿雨淨煙霞春風綻百花綠楊中禁路朱戟五侯家草
色金隄晚鶯聲御柳斜無媒猶未達應共惜年華

秋夜寄江南舊游

寥落九秋晚端憂時物殘隔林螢影度出禁漏聲寒愁
雨洞房掩孤燈遙夜闌懷賢夢南國興盡水漫漫

送寇侍郎司馬之明州

斗酒上河梁驚魂去越鄉地窮滄海濶雲入剡山長蓮

唱蒲魚熟人煙橘柚香蘭亭應駐楫今古共風光

蒲魚盧綸詩同此利
蒲魚俗本作蒲菊誤

周禮職
方其利

送李正字之蜀

已獻甘泉賦仍登片玉科漢官新組綬蜀國舊煙蘿劒
壁秋雲斷巴江夜月多無窮別離思遙寄竹枝歌

夏日陪馮許二侍郎與嚴秘書遊昊天觀覽舊題

寄同里楊華州中丞

三伏草木變九城車馬煩碧霄迴騎射丹洞入桃源臺
殿雲浮棟綉纓鶴在軒莫將真破妄聊用靜持喧石甃
古苔冷水筠涼簟翻黃公壚下嘆旌旆國東門

奉酬淮南中書相公見寄

并序

皇帝改元之二年余與趙公同制入輔並為黃
門侍郎夏五月連拜弘文崇文大學士冬十月
詔授檢校吏部尚書兼門下侍郎彤弓旅矢出
鎮西蜀後九月趙公加大司馬之秩右弼如故
龍旂虎符出制淮海時號揚益俱為重藩左右
皇都萬里何遠公手提兵柄心匠化源芳詞賦

余情勤靡極質文相映金玉鏘然蜀道之阻長
楚郊之風物襟靈所屬盡在斯矣永懷趙公歲
寒交好之情因成詩人不可方思之義聊書匪
報以款遐心

揚州隋故都竹使漢名儒翊聖恩華異持衡節制殊朝
廷連受賑台座接訐謨金玉裁王度丹書奉帝俞九重
辭象魏十萬握兵符鐵馬秋臨塞虹旌夜渡瀘江長梅
笛怨天遠桂輪孤浩嘆煙霜曉芳期蘭蕙蕪雅言書一
札賓海雁東隅歲月奔波盡音微霧雨濡蜀江分井絡
錦浪入淮湖獨抱相思恨關山不可踰

和楊弘微春日曲江南望

遲景靄悠悠傷春南陌頭暄風一澹蕩遐思幾殷憂龍
去空仙沼鸞飛掩妓樓芳菲餘雨露冠蓋舊公侯朱戟
千門閉黃鸝百轉愁煙濛宮樹晚花咽石泉流寒谷律
潛應中林蘭自幽商山將避漢晉室正藩周黍稷聞興
歎瓊瑤畏見投君心即吾事微尚在滄洲

長安秋夜懷陳京昆季

鐘鼓九衢絕出門千里同遠情高枕夜秋思北窗空靜
見煙凝燭閑聽葉墜桐玉壺思洞徹瓊樹憶葱蘢螢影
疎簾外鴻聲暗雨中羈愁難會面嬾慢責微躬甲乙科
攀桂圖書閣踐蓬一瓢非可樂六翻未因風寥落悲秋
盡蹉跎惜歲窮明朝不相見流淚菊花叢

冬日漢江南行將赴夏口途次江陵界寄裴尚書
五部擁雙旌南依墨客卿關山迴梁甸波浪接湓城煙
景迷時候雲帆渺去程蛤珠馮月吐蘆雁觸羅驚浦樹
凝寒晦江天湛鏡清賞心隨處愜壯志逐年輕舟楫不
可駐提封如任情向方曾指路射策許言兵蘭渚歌芳
意菱歌非應聲元戎武昌守羊祜幸連營

甲午歲相國李公有北園寄贈之作吟翫歷時屢
促酬荅機務不暇未及報章今古遠分電波增
感留墓劍而心許感鄰笛而意傷寓哀冥漠以
廣遺韻云

機事勞西掖幽懷寄北園鶴巢深更靜蟬噪斷猶喧仙

醞百花馥艷歌雙東翻碧雲詩變雅皇澤葉流根未報
雕龍贈俄傷淚劍痕佳城開白日哀挽去青門禮命公
台重煙霜隴樹繁天高不可問空使輔星昏

和楊二舍人晚秋與崔二舍人張秘監苗考功同
遊昊天觀時中書寓直不得陪隨因追往年曾
與舊僚聯遊此觀紀題在壁已有淪亡書事感
懷輒以呈寄兼呈東省三給事之作楊君見徵
鄙詞因以繼和

瑤圃高秋會金閨奉詔辰朱輪天上客白石洞中人珮
響泉聲雜朝衣羽服親九重青瑣閉三秀紫芝新化藥
秦方士偷桃漢侍臣玉笙王子駕遼鶴令威身嘆逝顏

波速緘詞麗曲春重將悽恨意苔壁問遺塵

秋懷奉寄朱補闕

上苑繁霜降騷人起恨初白雲深陋巷衰草遍閒居暮
色秋煙重寒聲牖葉虛潘生秋思苦陶令世情疎已製
歸田賦猶陳諫獵書不知青瑣客投分竟何如

酬嚴維秋夜見寄

遙夜思悠悠聞鐘遠夢休亂林螢燭暗零露竹風秋啓
戶雲歸棟褰簾月上鉤昭明逢聖代羈旅別滄洲騎省
潘郎思衡門宋玉愁神仙慙李郭詞賦謝曹劉松栢應
無變瑤瑤不可酬誰堪此時景寂寞下高樓

途次近蜀驛蒙恩賜寶刀及飛龍廢馬使還因寄

中書李鄭二公

草草事行役遲遲違故關碧幢遙隱霧紅旆漸依山感
激酬恩淚星霜去國顏捧刀金錫字歸馬玉連環威鳳
翔雙闕征夫護百蠻應憐宣室召溫樹不同攀

歸燕

春色遍芳菲閒簷雙燕歸還同舊侶至來遶故巢飛敢
望煙霄達多慙羽翮微啣泥傍金砌拾蕊到荆扉雲海
經時別雕梁長日依主人能一顧轉盼自光輝

聞相公三兄小園置宴以元衡寓直因寄上兼呈

中書三兄

休沐限中禁家山傳勝遊露寒潘省夜木落庾園秋蘭

菊迴幽步壺觴洽舊儔位高天祿閣詞異畔牢愁孤思
琴先覺馳暉水競流明朝不相見清祀在園丘

送崔判官使太原

勞君車馬此逡巡我與劉君本世親兩地山河分節制
十年京洛共風塵笙歌幾處胡天月羅綺長留蜀國春
報主末由須盡敵相期萬里寶刀新

送張六諫議歸朝

詔書前日下丹霄頭戴儒冠脫皂貂笛怨柳營煙漠漠
雲愁江館雨瀟瀟駕鴻得路爭先翥松桂凌寒識後凋
歸去朝端如有問玉門關外老班超

酬嚴司空荆南見寄

金貂再入三公府玉帳連封萬戶侯簾卷青山巫峽曉
煙開碧樹渚宮秋劉琨坐嘯風清塞謝朓題詩月滿樓
白雪調高歌不得美人南望翠蛾愁

南徐別業早春有懷

生涯擾擾竟何成自愛深居隱姓名遠雁臨空翻夕照
殘雲帶雨過春城花枝入戶猶含潤泉水侵階乍有聲
虛度年華不相見離腸懷土併關情

摩訶池宴

摩訶池上春光早愛水看花日日來穠李雪開歌扇掩
綠楊風動舞罽回燕臺事往空留恨金谷時危悟惜才
晝短欲將清夜繼西園自有月徘徊

春暮郊居寄朱舍人

幽深不謝子真居
度日閑眠世事疎
春水滿池新雨霽
香風入戶落花餘
目隨鴻雁窮蒼翠
心寄煙雲任卷舒
回首知音青瑣闥
何時一為薦相如

秋燈對雨寄史近崔積

坐聽宮城傳晚漏
起看衰葉下寒枝
空庭綠草結離念
細雨黃花贈所思
蟋蟀已驚良節度
茱萸偏憶故人期
相逢莫厭樽前醉
春去秋來自不知

春題龍門香山寺

衆香天上梵仙宮
鐘磬寥寥半碧空
清景乍開松嶺月
亂流長響石樓風
山河杳映春雲外
城闕參差曉樹中

欲盡出尋那可得
三千世界本無窮

酬談校書長安秋夜對月寄諸故舊

故園千里渺遐情
黃葉蕭條白露生
驚鵲遶枝風滿幌
寒鐘送曉月當楹
蓬山高價傳新韻
槐市芳年挹盛名
莫怪孔融悲歲序
五侯門館重婁卿

送田三端公還鄂州

孤雲迢遞戀滄洲
勸酒梨花對白頭
南陌送歸車騎合
東城怨別管絃愁
青油幕裏人如玉
黃鶴樓中月並鉤
君去庾公應借問
馳心千里大江流

春興

楊柳陰陰細雨晴
殘花落盡見流鶯
春風一夜吹香夢

又逐春風到洛城

重送盧三十一起居

相如擁傳有光輝何事闌干淚濕衣舊府東山餘妓在
重將歌舞送君歸

題嘉陵驛

悠悠風旆繞山川山驛空濛雨似煙路半嘉陵頭已白
蜀門西更上青天

摩訶池送李侍御之鳳翔

柳暗花明池上山高樓歌酒換離顏他時欲寄相思字
何處黃雲是隴關

淮渡

暮濤凝雪長淮水細雨飛梅五月天行子不須愁夜泊
綠楊多處有人煙

塞外月夜寄荆南熊侍御

南依劉表北劉琨征戰年年簫鼓喧雲雨一乖千萬里
長城秋月洞庭猿

同張惟送霍總赴池州

春風簫管怨津樓三奏行人醉不留別後相思江一岸
落花飛處杜鵑愁

羊士諤

士諤泰山人登貞元元年進士第元和初以省郎
貶資州刺史

順宗實錄云士諤初為宣歙巡官以公事至京遇
王叔文用事不能平公言其非叔文怒欲下詔斬
之韋執誼不可則令杖殺之又不可因貶汀州寧
化尉竇羣呂溫傳云羣溫與士諤險躁好奇趣尚
相狎羣為御史中丞欲引士諤與溫為知雜宰相
李吉甫持不下因共誣構吉甫憲宗知其偽並貶
逐士諤得資州
徐獻忠曰士諤詩氣格昂然不落卑調然列之能
品亦蕭然微耳

古體詩

小園春至偶呈吏部竇郎中孟負外

松篠雖古節冰霜慘其間欣然發佳色如喜東風還幽
抱想前躅冥鴻度南山春臺一以眺達士亦解顏偃息
非老圃沈吟闕元關馳暉忽復失壯歲不得聞君子當
濟物丹梯誰共攀心期自有約去掃蒼苔斑

九月十日郡樓獨酌

掾吏當授衣郡中稀物役嘉辰悵已失殘菊誰為惜櫪
軒一樽汎天景洞虛碧暮節獨賞心寒江鳴湍石歸期
北州里舊友東山客飄蕩雲海深相思桂花白

近體詩

郡中翫月寄江南李少尹虞部孟負外

月滿自高丘江通無狹流軒窗開到曉風物坐含秋鵲

警銀河斷蛩悲翠幕幽清光望不極耿耿下西樓

桂華臨洛浦如挹李膺仙茲夕披雲望還吟擲地篇鳳

池分直夜牛渚泛舟年會是風流賞惟君內史賢

圓景曠佳賓徘徊夜漏頻金波徒沉酒瑤瑟已生塵露

白移長簟風清掛幅巾西園舊才子想見洛陽人時在盧雲夫書

分司入洛

乾元初嚴黃門自京兆少尹貶牧巴郡以長才英

氣因多暇日每遊郡之東山山側精舍有盤石

細泉疏為流盃之勝苔深樹老蒼然遺躅士諤

謬因出守得繼茲賞乃賦詩十四韻刻於石壁

石座雙峯古雲泉九曲深寂寥疏鑿意蕪沒歲時侵遶

席流還壅浮杯咽復沈追懷王謝侶更似會稽岑始請流杯之地

光輝輕尺璧然諾重黃金幾醉東山妓長懸北闕心蕙

蘭留雜佩桃李想華簪時郊詹事昂自拾遺貶清化尉黃門年三十餘且為府主與郊意氣友善賦詩高會文字猶存

閑閣余何事鳴騶亦屢尋軒裳遵往轍風景憇中林橫

吹多悽調安歌送好音初筵方側弁故老忽沾襟時老僧常覺在

欽無能愧陳力惆悵拂瑤琴自言目睹黃門遊集之日歷歷可聽及聞絲竹發聲泣然流涕云逮此五十餘年想見故事

郡中即事

曉風山郭雁飛初霜拂回塘水榭虛鼓角清明如戰壘

梧桐搖落似貧居青門遠憶中人產白首聞看太史書

城下秋江寒見底賓筵莫訝食無魚

亂後曲江

憶昔曾遊曲水濱春來長有探春人
遊春人盡空池在直至春深不似春

彭州蕭使君出妓夜宴見送

玉顏紅燭忽驚春微步凌波暗拂塵
自是當歌斂眉黛不應惆悵為行人

翫荷花

紅衣落盡暗香殘葉上秋光白露寒
越女含情已無限莫教長裊倚闌干

王學士獨遊青龍寺翫紅葉因贈

十畝蒼苔繞畫廊幾株紅樹過青霜
高情還似看花去閒對南窗步夕陽

張碧

碧字大碧貞元中人自序其詩云碧嘗讀李長吉
集謂春拆紅翠霹靂開蟄戶其奇峭者不可及也及
覽李太白詞天與俱高青且無際鷗觸巨海瀾濤
怒翻則觀長吉之篇若陟嵩之巔視諸阜者邪余
嘗銳志狂勇心魄恨不得攤文陣以交鋒觀拔戟
挾鞘而已

古體詩

秋日登岳陽樓晴望

三秋倚練飛金盞洞庭波定平如剗天高雲卷綠蘿低
一點君山礙人眼漫漫萬頃鋪琉璃烟波濶遠無鳥飛
西南東北競無際直疑浸斷青天涯屈原回日牽愁吟
龍宮感激致應沈賈生憔悴說不得茫茫煙靄堆湖心

鴻溝

毒龍銜日天地昏八紘變黷生愁雲秦原走鹿無藏處
紛紛爭處蜂成羣四溟波立鯨相吞蕩搖五岳崩山根
魚蝦舞浪狂鯁鯁龍蛇膽戰登鴻門星旗羽鏃強者尊
黑風白雨東西屯山河欲拆人煙分壯士鼓勇君王存
項莊憤氣吐不得亞父斗聲天上聞玉光隋地驚崑崙
留侯氣魄吞太華舌頭一寸生陽春神農女媧愁不言

蛇枯老媪啼淚痕星曹定秤秤王孫項籍骨輕迷精魂
沛公仰面爭乾坤須臾垓下賊星起歌聲繚繞悽人耳
吳娃捧酒橫秋波霜天月照空城壘力拔山兮忽到此
騅嘶懶渡烏江水新豐瑞色生樓臺西楚寒蒿哭愁鬼
三尺霜鳴金匣裏神光一照八千里漢皇驟馬意氣生
西南掃地迎天子

美人梳頭

玉堂花院小枝紅綠窗一片春光曉玉容驚覺濃睡醒
圓蟾挂出妝臺表金盤解下叢鬟碎三尺巫雲綰朝翠
皓指高低寸黛愁水精梳滑參差墜須臾攏掠蟬鬢生
玉釵冷透冬冰明芙蓉拆向新開臉秋泉慢轉眸波橫

鸚鵡偷來話心曲屏風半倚遙山綠

題祖山人池上怪石

寒姿數片奇突兀曾作秋江秋水骨先生應是厭風雷
著向江邊塞龍窟我來池上傾酒罇半酣書破青煙痕
參差翠縷擺不落筆頭驚怪粘秋雲我聞吳中項容水
墨有高價邀得將來倚松下鋪却雙繒直道難掉首空
歸不成畫

御定全唐詩錄卷第五十七

御定全唐詩錄卷第五十八

禮部侍郎臣徐倬翰林院侍讀學士臣徐元正奉

旨校刊

白居易

居易字樂天其先蓋太原人後徙下邳居易敏悟
絕人工文章未冠謁顧况况吳人恃才少所推可
覩姓名熟視曰長安米貴居大不易及讀其芳草
詩至野火燒不盡春風吹又生嘆曰吾謂斯文遂
絕今復得子矣貞元中擢進士拔萃皆中補校書
郎元和元年對制策乙等調整屋尉為集賢校理
月中召入翰林為學士遷左拾遺歲滿當遷帝以

資淺且家素貧聽自擇官居易請如姜公輔以學士兼京兆戶曹參軍以便養詔可明年以母喪解還拜左贊善大夫是時盜殺武元衡京兆震擾居易首上疏請亟捕賊刷朝廷恥以必得為期宰相嫌其出位不悅俄有言居易母隋井死而居易賦新井篇言浮華無實行不可用出為州刺史中書舍人王涯上言不宜治郡追貶江州司馬既失志能順適所遇託浮屠生死說若忘形骸者久之徙忠州刺史入為司門員外郎以主客郎中知制誥俄轉中書舍人旬外遷為杭州刺史久之以太子左庶子分司東都復拜蘇州刺史病免文宗立以

秘書監召遷刑部侍郎封晉陽縣男太和初二李黨事興險利乘之更相奪移進退毀譽若旦暮然楊虞卿與居易姻家而善李宗閔居易惡緣黨人升乃移病還東都除太子賓客分司開成初起為同州刺史不拜改太子少傅進馮翊縣侯會昌初以刑部尚書致仕六年卒年七十五贈尚書右僕射宣宗以詩吊之遺命薄葬毋請謚與弟行簡從祖弟敏中友愛東都所居履道里疏沼種樹構石樓香山鑿八節灘自號醉吟先生為之傳暮節惑浮屠道尤甚至經月不食葷稱香山居士嘗與胡杲等燕集皆高年不事者人慕之繪為九老圖居

易於文章精切然最工詩頗以規諷得失及其多
更下偶俗好至數千篇當時士人爭傳雞林行賈
售其國相率篇易一金其偽者相輒能辨之初與
元稹酬詠故號元白稹卒又與劉禹錫齊名號劉
白其始生七月能展書姆指之無兩字雖試百數
不差九歲暗識聲律其篤於文章蓋天稟然敏中
為相請謚有司曰文後履道第卒為佛寺東都江
州民為立祠焉

元稹長慶集叙云揚越間多作書模勒樂天及余
雜詩賣於市肆之中又云余嘗於平水市中見邨
校諸童競習詩召而問之皆對曰先生教我樂天

微之詩固亦不知余之為微之也

居易與元稹書云聞親友間說禮吏部舉選人多
以僕私試賦判傳為準的其餘詩句往往在人口
中及再來長安又聞有軍使高霞寓者欲聘倡妓
妓大誇曰我誦得白學士長恨歌豈同他妓哉由
是增價又足下書云到通州日見江館柱間有題
僕詩者復何人哉又昨過漢南日適遇主人集衆
樂娛他賓諸妓見僕來指而相顧曰此是秦中吟
長恨歌主耳自長安抵江西三四千里凡鄉校佛
寺逆旅行舟之中往往有題僕詩者士庶僧徒孀
婦處女之口每每有詠僕詩者此誠雕蟲之戲不

足為多然今時俗所重正在此耳

通攷晁氏云居易在杭州自類詩彙分諷諭閒適感傷雜律四類前集五十卷後集二十卷

墨客揮犀云樂天每作詩令一老嫗解之問曰解否嫗曰解則錄之不解則不復集故唐末之弊至俚

全唐詩話云樂天不為贊皇公所喜每寄文章李緘之一筐未嘗開劉夢得或請之曰見詞則迴吾心矣

古體詩

賀雨

皇帝嗣寶曆元和三年冬自冬及春暮不雨旱熾熾上
心念下民懼歲成災凶遂下罪已詔殷勤制萬邦帝曰
余一人繼天承祖宗憂勤不遑寧夙夜心忡忡元年誅
劉闢一舉靖巴邛二年戮李錡不戰安江東顧惟眇眇
德遠有巍巍功或者天降沴無乃倣余躬上思答天戒
下思致時邕莫如率其身慈和與儉恭乃命罷進獻乃
命賑饑窮宥死降五刑已責寬三農宮女出宣徽廢馬
減飛龍庶政靡不舉皆由自宸衷奔騰道路人偃偻田
野翁歡呼相告報感泣涕沾曾順人人心悅先天天意
從詔下纔七日和氣生冲融凝為悠悠雲散作習習風
晝夜三日雨淒淒復濛濛萬心春熙熙百穀青芄芃人

變愁為喜歲易儉為豐乃知王者心憂樂與眾同皇天
與后土所感無不通冠佩何鏘鏘將相及王公蹈舞呼
萬歲列賀明庭中小臣誠愚陋職忝金鑾宮稽首再三
拜一言獻天聰君以明為聖臣以直為忠敢賀有其始
亦願有其終

夢仙

人有夢仙者夢身升上清坐乘一白鶴前引雙紅旌羽
衣忽飄飄玉鸞俄錚錚半空直下視人世沈冥冥漸失
鄉國處纔分山水形東海一片白列岳五點青須臾羣
仙來相引朝玉京安期羨門輩列侍如公卿仰謁玉皇
帝稽首前致誠帝言汝仙才努力勿自輕却後十五年

期汝不死庭再拜受斯言既寤喜且驚秘之不敢泄誓
志居巖扃恩愛捨骨目飲食斷羶腥朝飡雲母散夜吸
沆瀣精空山三十載日望輜輶迎前期過已久鸞鶴無
來聲齒髮日衰白耳目減聰明一朝同物化身與糞壤
并神仙信有之俗力非可營苟無金骨相不列丹臺名
徒傳辟穀法虛受燒丹經只自取勤苦百年終不成悲
哉夢仙人一夢誤一生

觀刈麥

時為盩厔縣尉

田家少閒月五月人倍忙夜來南風起小麥覆隴黃婦
姑荷簞食童稚攜壺漿相隨餉田去丁壯在南崗足蒸
暑土氣背灼炎天光力盡不知熱但惜夏日長復有貧

婦人抱子在其傍右手秉遺穗左臂懸弊筐聽其相顧
言聞者為悲傷家田輸稅盡拾此充饑腸今我何功德
曾不事農桑吏祿三百石歲宴有餘糧念此私自愧盡
日不能忘

題海圖屏風

元和巳
丑年作

海水無風時波濤安悠悠鱗介無小大遂性各沈浮突
兀海底鼇首冠三神丘釣網不能制其來非一秋或者
不量力謂茲鼇可求鼯鼯牽不動綸絕沈其鉤一鼇既
頓頷諸鼇齊掉頭白濤與黑浪呼吸繞咽喉噴風激飛
廉鼓波怒陽侯鯨鯢得其便張口欲吞舟萬里無活鱗
百川多倒流遂使江漢水朝宗意亦休蒼然屏風上此

畫良有由

羸駿

驂騑失其主羸餓無人牧向風嘶一聲莽蒼黃河曲躡
冰水畔立卧雪塚間宿歲暮田野空寒草不滿腹豈無
市駿者盡是凡人目相馬失於瘦遂遺千里足邨中何
擾擾有吏徵芻粟淪彼軍廢中化作駑駘肉

廢琴

絲桐合為琴中有太古聲古聲淡無味不稱今日情玉
徽光彩滅朱絃塵土生廢棄來已久遺音尚泠泠不辭
為君彈縱彈人不聽何物使之然羌笛與秦箏

李都尉古劍

白居易

古劍寒黯黯鑄來幾千秋白光納日月紫氣排斗牛有
客借一觀愛之不敢求湛然玉匣中秋水湛不流至寶
有本性精剛無與儔可使寸寸折不能繞指柔願快直
士心將斷佞臣頭不願報小怨夜半刺私讐勸君慎所
用無作神兵羞

雲居寺孤桐

一株青玉立千葉綠雲委亭亭五丈餘高意猶未已山
僧年九十清淨老不死自云手種時一顆青桐子直從
萌芽拔高自毫末始四面無附枝中心有通理寄言立
身者孤直當如此

京兆府新栽蓮

時為盩厔縣尉趨府作

汚溝貯濁水水上葉田田我來一長嘆知是東溪蓮下
有清泥汚馨香無復全上有紅塵撲顏色不得鮮物性
猶如此人事亦宜然託根非其所不如遭棄捐昔在溪
中日花葉媚清漣今來不得地顛顛府門前

初授拾遺

奉詔登左掖束帶參朝議何言初命卑且脫風塵吏杜
甫陳子昂才名括天地當時非不遇尚無過斯位况予
蹇薄者寵至不自意驚近白日光慙非青雲器天子方
從諫朝廷無忌諱豈不思匪躬適遇時無事受命已旬
月飽食隨班次諫紙忽盈箱對之終自愧

贈元稹

白居易

白居易

自我從宦遊七年在長安所得惟元君乃知定交難豈
無山上苗徑寸無歲寒豈無要津水咫尺無波瀾之子
異於是久處誓不諼無波古井水有節秋竹竿一為同
心友三及芳歲闌花下鞍馬遊雪中杯酒歡衡門相逢
迎不具帶與冠春風日高睡秋月夜深看不為同登科
不為同署官所合在方寸心源無異端

宿紫閣山北邨

晨遊紫閣峯暮宿山下邨村老見予喜為予開一尊舉
杯未及飲暴卒來入門紫衣挾刀斧草草十餘人奪我
席上酒掣我盤中飧主人退後立斂手反如賓中庭有
奇樹種來三十春主人惜不得持斧斷其根口稱采造

家身屬神策軍主人慎勿語中尉正承恩

蜀路石婦

道傍一石婦無記亦無銘傳是此鄉女為婦孝且貞十
五嫁邑人十六夫征行夫行二十載婦獨守孤熒其夫
有父母老病不安寧其婦執婦道一一如禮經晨昏問
起居恭順發心誠藥餌自調節饒羞必甘馨夫行竟不
歸婦德轉光明後人高其節刻石像婦形儼然整衣巾
若立在閨庭似見舅姑禮如聞環珮聲至今為婦者見
此孝心生不比山頭石空有望夫名

折劍頭

拾得折劍頭不知折之由一握青蛇尾數寸碧峯頭疑

是斬鯨鯢不然刺蛟虬缺落泥土中委棄無人收我有
鄙介性好剛不好柔勿輕直折劔猶勝曲全鉤

登樂遊園望

獨上樂遊園四望天日曛東北何靄靄宮闕入煙雲愛
此高處立忽如遺垢氛耳目暫清曠懷抱鬱不伸下視
十二街綠樹間紅塵車馬徒滿眼不見心所親孔生死
洛陽元九謫荆門可憐南北路高蓋者何人

感鶴

鶴有不羣者飛飛在野田饑不啄腐鼠渴不飲盜泉貞
姿自耿介雜鳥何翩翩同遊不同志如此十餘年一興
嗜慾念遂為矰繳牽委質小池內爭食羣雞前不惟懷

稻粱兼亦競腥羶不惟戀主人兼亦狎鳥鳶物心不可
知天性有時遷一飽尚如此况乘大夫軒

白牡丹

和錢學士作

城中看花客旦暮走營營素華人不顧亦占牡丹名開
在深寺中車馬無來聲唯有錢學士盡日遶叢行憐此
皓然質無人自芳馨衆嫌我獨賞移植在中庭留景夜
不暝迎光曙先明對之心亦靜虛白相向生唐昌玉蕊
花攀翫衆所爭折來比顏色一種如瑤瓊彼因稀見貴
此以多為輕始知無正色愛惡隨人情豈惟花獨爾理
與人事并君看入眼者紫艷與紅英

贈內

白居易

生為同室親死為同穴塵他人尚相勉而况我與君黔
婁固窮士妻賢忘其貧冀缺一農夫妻敬儼如賓陶潛
不營生翟氏自爨薪梁鴻不宦仕孟光甘布裙君雖不
讀書此事耳亦聞至此千載後傳是何如人人生未死
間不能忘其身所須者衣食不過飽與溫蔬食足充饑
何必嘗膏珍繒絮足禦寒何必錦繡文君家有遺訓清
白貽子孫我亦貞苦士與君新結婚庶保貧與素偕老
同欣欣

寄唐生

賈誼哭時事阮籍哭路岐唐生今亦哭異代同其悲唐
生者何人五十寒且饑不悲口無食不悲身無衣所悲

忠與義悲甚則哭之太尉擊賊日段太尉以笏擊朱泚尚書叱盜時

顏尚書叱李希烈大夫死兇寇陸大夫為亂兵所害諫議謫蠻夸楊諫議左遷道州每見

如此事聲發涕輒隨往往聞其風俗士猶或非憐君頭
半白其志竟不衰我亦君之徒鬱鬱何所為不能發聲
哭轉作樂府詩篇篇無空文句句必盡規功高虞人箴
痛甚騷人辭非求宮律高不務文字奇惟歌生民病願
得天子知未得天子知甘受時人嗤藥良氣味苦琴淡
音聲稀不懼權豪怒亦任親朋譏人竟無奈何呼作狂
男兒每逢羣盜息或遇雲霧披但自高聲歌庶幾天聽
卑歌哭雖異名所感則同歸寄君三十章與君為哭詞

傷唐衢

白居易

自我心存道外物少能逼常排傷心事不為長嘆息忽
聞唐衢死不覺動顏色悲端從東來觸我心惻惻伊昔
未相知偶遊滑臺側同宿李翱家一言如舊識酒酣出
送我風雪黃河北日西並馬頭語別至昏黑君歸向東
鄭我來遊上國交心不交面從此重相憶憐君儒家子
不得詩書力五十著青衣試官無祿食遺文僅千首六
義無差忒散在京洛間何人為收拾

憶昨元和初忝備諫官位是時兵革後生民正憔悴但
傷民病痛不識時忌諱遂作秦中吟一吟悲一事貴人
皆怪怒聞人亦非訾天高未及聞荆棘生滿地唯有唐
衢見知我平生志一讀興嘆嗟再吟垂涕泗因和三

韻手題遠緘寄致吾陳杜間賞愛非常意此人無復見
此詩猶可貴今日開篋看蠹魚損文字不知何處葬欲
問先歔歔終去哭墳前還君一掬淚

陳杜謂子昂與甫也此詩猶可貴謂唐衢詩也

問友

種蘭不種艾蘭生艾亦生根艾相交長莖葉相附榮香
莖與臭葉日夜俱長大鋤艾恐傷蘭漑蘭恐滋艾蘭亦
未能漑艾亦未能除沈吟意不決問君欲何如

紫藤

藤花紫蒙茸藤葉青扶疎誰謂好顏色而為害有餘下
如蛇屈盤上若繩縈紆可憐中間樹束縛成枯株柔蔓
不自勝嫋嫋挂空虛豈知纏樹木千夫力不如先柔後

為害有似諛佞徒附著君權勢君迷不宥誅又如妖婦
人綢繆蠱其夫奇邪壞人室夫惑不能除寄言邦與家
所慎在其初毫末不早辨滋蔓信難圖願以藤為戒銘
之於座隅

燕詩示劉叟

并序

叟有愛子背叟逃去叟甚悲念之叟少年亦嘗
如是故作燕詩以諭之

梁上有雙燕翩翩雄與雌銜泥兩椽間一巢生四兒四
兒日夜長索食聲孜孜青蟲不易捕黃口無飽期觜爪
雖欲弊心力不知疲須臾千來往猶恐巢中饑辛勤三
十日母瘦雛漸肥喃喃教言語一一刷毛衣一旦羽翼

成引上庭樹枝舉翅不回顧隨風四散飛雌雄空中鳴
聲盡呼不歸却入空巢裏啁啾終夜悲燕燕爾勿悲爾
當返自思思爾為雛日高飛背母時當時父母念今日
爾應知

采地黃者

麥死春不雨禾損秋早霜歲晏無口食田中采地黃采
之將何用持以易饑糧凌晨荷鋤去薄暮不盈筐攜來
朱門家賣與白面郎與君啖肥馬可使照地光願易馬
殘粟救此苦饑腸

鄧魴張徹落第

古琴無俗韻奏罷無人聽寒松無妖花枝下無人行春

風十二街軒騎不暫停奔車看牡丹走馬聽秦箏衆目
悅芳艷松獨守其貞衆耳喜鄭衛琴亦不改聲懷哉二
夫子念此無自輕

送王處士

王門豈無酒侯門豈無肉主人貴且驕待客禮不足望
塵而拜者朝夕走碌碌王生獨拂衣遐舉如雲鵠寧歸
白雲外飲水卧空谷不能隨衆人斂手低眉目扣門與
我別沽酒留君宿好去采薇人終南山正綠

諭友

昨夜霜一降殺君庭中槐乾葉不待黃索索飛下來憐
君感物節晨起步前階臨風蹋葉立半日顏色哀西望
長安城歌鐘十二街何人不歡樂君獨心悠哉白日頭
上走朱顏鏡中顏平生青雲心銷化成死灰我今贈一
言勝飲酒千杯其言雖甚鄙可破悒悒懷朱門有勲貴
陋巷有顏回窮通各有命不繫才不才推此自裕裕不
必待安排

新製布裘

桂布白似雪吳綿軟於雲布重綿且厚為裘有餘溫朝
擁坐至暮夜覆眠達晨誰知嚴冬月支體暖如春中夕
忽有念撫裘起逡巡丈夫貴兼濟豈獨善一身安得萬
里裘蓋裹周四垠穩暖皆如我天下無寒人

放魚

自此後詩
到江州作

曉日提竹籃家僮買春蔬青青芹蕨下疊卧雙白魚無
聲但呀呀以氣相煦濡傾籃寫地上撥刺長尺餘豈惟
刀几憂坐見螻蟻圖脫泉雖已久得水猶可蘇放之小
池中且用救乾枯水小池窄狹動尾觸四隅一時幸苟
活久遠將何如憐其不得所移放於南湖南湖連西江
好去勿踟躕施恩即望報吾非斯人徒不須泥沙底辛
苦覓明珠

潯陽三題 并序

廬山多桂樹湓浦多脩竹東林寺有白蓮花皆
植物之貞勁秀異者雖宮園省寺中未必能盡
有夫物以多為賤故南方人不貴重之至有蒸

爨其桂剪棄其竹白眼於蓮花者予惜其不生
於北土也因賦三題以唁之

廬山桂

偃蹇月中桂結根依青天天風繞月起吹子下人間飄
零委何處乃落匡廬山生為石上桂葉如剪碧鮮枝幹
日長大根芟日牢堅不歸天上月空老山中年廬山去
咸陽道里三四千無人為移植得入上林園不及紅花
樹長栽溫室前

湓浦竹

潯陽十月天天氣仍溫燠有霜不殺草有風不落木元
冥氣力薄草木冬猶綠誰宜湓浦頭迴眼看脩竹其有

顧盼者持刀斬且束剖劈青琅玕家家蓋牆屋吾聞汾
晉間竹少重如玉胡為取輕賤生此西江曲

東林寺白蓮

東林北塘水湛湛見底清中生白芙蓉菡萏三百莖白
日發光彩清飈散芳馨洩香銀囊破瀉露玉盤傾我慙
塵埃眼見此瓊瑤英乃知紅蓮花虛得清淨名夏萼敷
未歇秋芳結纔成夜深衆僧寢獨起繞池行欲收一顆
子寄向長安城但恐出山去人間種不生

秦中吟十首

并序

貞元元和之際予在長安聞見之間有足悲者
因直歌其事命為秦中吟

議婚

天下無正聲悅耳即為娛人間無正色悅目即為姝顏
色非相遠貧富則有殊貧為時所棄富為時所趨紅樓
富家女金縷繡羅襦見人不斂手嬌癡二八初母兄未
開口已嫁不須更綠窗貧家女寂寞二十餘荆釵不直
錢衣上無真珠幾迴人欲聘臨日又踟躕主人會良媒
置酒滿玉壺四座且勿飲聽我歌兩途富家女易嫁嫁
早輕其夫貧家女難嫁嫁晚孝於姑聞君欲娶婦娶婦
意何如

重賦

厚地植桑麻所要濟生民生民理布帛所求活一身身

外充征賦上以奉君親國家定兩稅本意在愛人厥初
防其淫明敕內外臣稅外加一物皆以枉法論奈何歲
月久貪吏得因循浚我以求寵斂索無冬春織絹未成
疋縑絲未盈斤里胥迫我納不許暫逡巡歲暮天地閉
陰風生破邨夜深煙火盡霰雪白紛紛幼者形不蔽老
者體無溫悲喘與寒氣併入鼻中辛昨日輸殘稅因窺
官庫門繒帛如山積絲絮似雲屯號為羨餘物隨月獻
至尊奪我身上暖買爾眼前恩進入瓊林庫歲久化為
塵

傷宅

誰家起甲第朱門大道邊豐屋中櫛比高牆外迴環纍

纍六七堂棟宇相連延一堂費百萬鬱鬱起青煙洞房
溫且清寒暑不能干高堂虛且迴坐卧見南山繞廊紫
藤架夾砌紅藥欄攀枝摘櫻桃帶花移牡丹主人此中
坐十載為大官厨有臭敗肉庫有貫朽錢誰能將我語
問爾骨肉間豈無貧賤者忍不救饑寒如何奉一身直
欲保千年不見馬家宅今作奉誠園

傷友

陋巷孤寒士出門苦栖栖雖云志氣在豈免顏色低平
生同門友通籍在金閨曩者膠漆契邇來雲雨睽正逢
下朝歸軒騎五門西是時天久陰三日雨淒淒蹇驢避
路立肥馬當風嘶迴頭忘相識占道上沙堤昔年洛陽

社貧賤相提攜今日長安道對面隔雲泥近日多如此
非君獨慘悽死生不變者唯聞任與黎

任公孫黎逢

不致仕

七十而致仕禮法有明文何乃貪榮者斯言如不聞可
憐八九十齒隨雙眸昏朝露貪名利夕陽憂子孫掛冠
顧翠綏懸車惜朱輪金章晉不勝偃偻入君門誰不愛
富貴誰不戀君恩年高須告老名遂合退身少時共嗤
誚晚歲多因循賢哉漢二疏彼獨是何人寂寞東門路
無人繼去塵

立碑

勲德既下衰文章亦陵夷但見山中石立作路旁碑銘

勲悉太公叙德皆仲尼復以多為貴千言直萬貨為文
彼何人想見下筆時但欲愚者悅不思賢者嗤豈獨賢
者嗤仍傳後代疑古石蒼苔字安知是愧詞我聞望江
縣麴令撫孳^{麴今名}在官有仁政名不聞京師身歿欲
歸葬百姓遮路岐攀轅不得去留葬此江湄至今道其
名男女涕皆垂無人立碑碣唯有邑人知

輕肥

意氣驕滿路鞍馬光照塵借問何為者人稱是內臣朱
紱皆大夫紫綬或將軍誇赴軍中宴走馬去如雲罇罍
溢九醞水陸羅八珍果擘洞庭橘膾切天池鱗食飽心
自若酒酣氣益振是歲江南旱衢州人食人

白居易

五絃

清歌且罷唱紅袂亦停舞趙叟抱五絃宛轉當曾撫大
聲簾若散颯颯風和雨小聲細欲絕切切鬼神語又如
鵲報喜轉作猿啼苦十指無定音顛倒宮徵羽坐客聞
此聲形神若無主行客聞此聲駐足不能舉嗟嗟俗人
耳好今不好古所以綠窗琴日日生塵土

歌舞

秦城歲云暮大雪滿皇州雪中退朝者朱紫盡公侯貴
有風雲興富無饑寒憂所營唯第宅所務在追遊朱門
車馬客紅燭歌舞樓歡酣促密坐醉暖脫重裘秋官為
主人廷尉居上頭日中為一樂夜半不能休豈知閔無分切

鄉獄中有凍死囚

買花

帝城春欲暮喧喧車馬度共道牡丹時相隨買花去貴
賤無常價酬直看花數灼灼百朵紅戔戔五束素上張
幄幕庇旁織筵籬護水灑復泥封移來色如故家家習
為俗人人迷不悟有一田舍翁偶來買花處低頭獨長
歎此歎無人喻一叢深色花十戶中人賦

御定全唐詩錄卷第五十八

御定全唐詩錄卷第五十九

禮部侍郎臣徐倬翰林院侍讀學士臣徐元正奉

旨校刊

白居易二

古體詩二

寓意詩

豫樟生深山七年而後知挺高二百丈本末皆十圍天子建明堂此材獨中規匠人執斤墨采度將有期孟冬草木枯烈火燎山陂疾風吹猛焰從根燒到枝養材三十年方成棟梁姿一朝為灰燼柯葉無子遺地雖生爾材天不與爾時不如糞土英猶有人掇之已矣勿重陳

白居易

御定全唐詩錄卷第五十九

五

重陳令人悲不悲焚燒苦但悲採用遲

赫赫京內史炎炎中書郎昨傳徵拜日恩賜頗殊常貂冠水蒼玉紫綬黃金章佩服身未暖已聞竄遐荒親戚不得別吞聲泣路旁賓客亦已散門前雀羅張富貴來不久倏如瓦溝霜權勢去尤速瞥若石火光不如守貧賤貧賤可久長傳語宦遊子且來歸故鄉

促織不成章提壺但聞聲嗟哉蟲與鳥無實有虛名與君定交日久要如弟兄何以示誠信白水指為盟雲雨一為別飛沉兩難并君為得風鵬我為失水鯨音信日已疎恩分日已輕窮通尚如此何況死與生乃知擇交難須有知人明莫將山上松結託水上萍

翩翩兩元鳥本是同巢燕分飛來幾時秋夏炎涼變一宿蓬葦廬一棲明光殿偶因銜泥處復得重相見彼矜杏梁貴此嗟茅棟賤眼看秋社至兩處俱難戀所托各暫時胡為相歎羨

婆娑園中樹根株大合圍蠢爾樹間蟲形質一何微孰謂樹之大花葉有衰時花衰夏未實葉病秋先萎樹心半為土觀者安得知借問蟲何在在身不在枝借問蟲何食食心不食皮豈無啄木鳥喙長將何為

和荅詩十首

并序
巽四首

五年春微之從東臺來不數日又左轉為江陵士曹掾詔下日會予下內直歸而微之已即路

邂逅相遇於街衢中自永壽寺南抵新昌里北
得馬上話別語不過相勉保方寸外形骸而已
因不暇及他是夕足下次於山北寺僕職役不
得去命季弟送行且奉新詩一軸致於執事凡
二十章率有比興淫文艷韻無一字焉意者欲
足下在途諷讀且以遣日時消憂懣又有以張
直氣而扶壯心也及足下到江陵寄在路所爲
詩十七章凡五六千言言有爲章有旨迨於宮
律體裁皆得作者風發絨開卷且喜且怪僕思
牛僧儒戒不能示他人唯與杓直拒非及樊宗
師輩三四人時一吟讀心甚貴重然竊思之豈

僕所奉者二十章遽能開足下聰明使之然也
抑又不知足下是行也天將屈足下之道激足
下之心使感時發憤而臻於此耶若兩不然者
何立意措辭與足下前時詩如此之相遠也僕
既羨足下詩又憐足下心盡欲引狂簡而和之
屬直宿拘牽居無暇日故不即時如意旬月來
多乞病假假中稍閒且摘卷中尤者繼成十章
亦不下三千言其間所見同者固不能自異異
者亦不能強同同者謂之和異者謂之荅并別
錄和夢遊春詩一章各附於本篇之末餘未和
者亦續致之頃者在科試間常與足下同筆硯

每下筆時輒相顧共患其意太切而理太周故
理太周則辭繁意太切則言激然與足下爲文
所長在於此所病亦在於此足下來叙果有詞
犯文繁之說今僕所和者猶前病也待與足下
相見日各引所作稍刪其繁而晦其義焉餘具
書白

和思歸樂

山中不棲鳥夜半聲嚶嚶似道思歸樂行人掩泣聽皆
疑此山路遷客多南征憂憤氣不散結化爲精靈我謂
此山鳥本不因人人心自懷土想作思歸鳴孟嘗平
居時娛耳琴泠泠雍門一言感未奏淚沾纓魏武銅雀

妓日與歡樂并一旦西陵望欲歌先涕零峽猿亦何意
隴水復何情爲入愁人耳皆爲腸斷聲請看元侍御亦
宿此郵亭因聽思歸鳥神氣獨安寧問君何以然道勝
心自平雖爲南遷客如在長安城云得此道來何慮亦
何營窮達有前定憂喜無交爭所以事君日持憲立大
庭雖有迴天力撓之終不傾況始三十餘年少有直名
心中志氣大眼前爵祿輕君恩若雨露君威若雷霆退
不苟免難進不曲求榮在火辨玉性經霜識松貞展禽
任三黜靈均長獨醒獲戾自東洛貶官向南荆再拜辭
闕下長揖別公卿荊州又非遠驛路半月程漢水照天
碧楚山插雲青江陵橘似珠宜城酒如餉誰謂譴謫去

未妨遊賞行人生百歲內天地暫寓形太倉一稊米大海一浮萍身委逍遙篇心付頭陀經尚達死生觀寧爲寵辱驚中懷苟有主外物安能縈任意思歸樂聲聲啼到明

和陽城驛

商山陽城驛中有歎者誰云是元監察江陵謫去時忽見此驛名良久涕欲垂何故陽道州名姓同於斯憐君一寸心寵辱誓不移疾惡若巷伯好賢如緇衣沉吟不能去意者欲改爲改爲避賢驛大署於門楣荆人愛羊祜戶曹改爲祠一字不忍道况兼姓呼之因題八百言言直文甚奇詩成寄與我鏗若金和絲上言陽公行友

悌無等夷骨肉同衾裯至死不相離次言陽公迹夏邑始棲遲鄉人化其風少長皆孝慈次言陽公道終日對酒卮兄弟笑相顧醉貌紅怡怡次言陽公節謇謇居諫司誓心除國蠹決死犯天威終言陽公命左遷天一涯道州炎瘴地身不得生歸一一皆實錄事事無子遺凡是爲善者聞之惻然悲道州旣已矣往者不可追何世無其人來者亦可思願以君子文告彼大樂師附於雅歌末奏之白玉墀天子聞此章教化如法施直諫從如流佞臣惡如疵宰相聞此章政柄端正持進賢不知倦去邪勿復疑憲臣聞此章不敢懷依違諫官聞此章不忍縱詭隨然後告史氏舊史有前規若作陽公傳欲令

後世知不勞叙世家不用費文辭但使國史上全錄元稹詩

荅桐花

山木多蒼鬱茲桐獨亭亭葉重碧雲片花簇紫霞英是時三月天春暖山雨晴夜色向月淺闇香隨風輕行者多商賈居者悉黎民無人解賞愛有客獨屏營手攀花枝立足蹋花影行生憐不得所死欲揚其聲截爲天子琴刻作古人形云待我成器薦之於穆清誠是君子心恐非草木情胡爲愛其華而反傷其生老龜被刳腸不如無神靈雄雞自斷尾不願爲犧牲況此好顏色花紫葉青青宜遂天地性忍加刀斧刑我思五丁力拔入九

重城當君正殿栽花葉生光晶上對月中桂下覆堦前
冀汎拂香爐煙隱映斧藻屏爲君發清韻泠泠如叩瓊
風來聲滿耳鄭衛不足聽受君封植力不獨吐芬馨助
君行春令開花應晴明受君雨露恩不獨含芳榮戒君
無戲言剪葉封弟兄受君歲月功不獨資生成爲君長
高枝鳳凰上頭鳴一鳴君萬歲壽如山不傾再鳴萬人
泰泰階爲之平如何有此用幽滯在巖坳歲月不爾駐
孤芳坐凋零請向桐枝上爲余題姓名待余有勢力移
爾獻丹庭

和大嘴烏

烏者種有二名同性不同嘴小者慈孝嘴大者貪庸嘴

大命又長生來十餘冬物老顏色變頭毛白茸茸飛來
亭樹上初但驚兒童老巫生奸計與烏意潛通云是非
凡鳥遙見起敬恭千歲乃一出喜賀主人翁祥瑞來白
日神靈占知風陰作北斗使能爲人吉凶此鳥所止家
家產日夜豐上以致壽考下可宜田農主人富家子身
老心童蒙隨巫拜復祝婦姑亦相從殺雞薦其肉敬若
禮六宗烏喜張大嘴飛接在虛空烏既飽羶腥巫亦饜
甘濃烏巫互相利不復兩西東日日營巢窟稍稍近房
櫳雖生八九子誰辨其雌雄羣雛又長成衆嘴逞殘兇
撥巢吞燕卵入簇啄蠶蟲豈無乘秋隼羈絆委高墉但
食烏殘肉無施搏擊功亦有能言鸚翅碧嘴距紅暫曾

說烏罪囚閉在深籠青青窓前柳鬱鬱井上桐貪烏占
棲息慈烏獨不容慈烏爾奚爲來往何憧憧曉去先晨
鼓暮歸後昏鐘辛苦塵土間飛啄禾黍叢得食將母哺
飢腸不自充主人憎慈烏命子削彈弓絃續會稽竹丸
鑄荆山銅慈烏求母食飛下爾庭中數粒未入口一丸
已中曾仰天號一聲似欲訴蒼穹反哺日未足非是惜
微躬誰能持此冤一爲問化工胡然大嘴烏竟得天年
終

有木詩 并序

余嘗讀漢書列傳見佞順媵嬰圖身忘國如張
禹輩者見惑上蠱下交亂君親如江充輩者見

暴狠跋扈壅君樹黨如梁冀輩者見色仁行違
先德後賊如王莽輩者又見外狀恢弘中無實
用者又見附離權勢隨之覆亡者其初皆有動
人之才足以惑衆媚主莫不合於始而敗於終
也因引風人騷人之興賦有木八章不獨諷前
人亦倣後代爾

有木名弱柳結根近清池風煙借顏色雨露助華滋
峩白雪毛嫋嫋青絲枝漸密陰自庇轉高梢四垂截枝
扶爲杖軟弱不自持折條用樊圃柔脆非其宜爲樹信
可翫論材何所施可惜金堤地栽之徒爾爲
有木名櫻桃得地早滋茂葉密獨承日花繁偏受露迎

風閣搖動引鳥自來去鳥啄子難成風來枝莫住低軟
易攀翫佳人屢回顧色求桃李饒心向松筠妬好是映
牆花本非當軒樹所以姓蕭人曾爲伐櫻賦
有木秋不凋青青在江北謂爲洞庭橘美人自移植上
受顧盼恩下勤澆漑力實成乃是枳臭苦不堪食物有
似是者真僞何由識美人默無言對之長歎息中含害
物意外矯凌霜色仍向枝葉間潛生刺如棘
有木名杜梨陰森覆丘壑心蠹已空朽根深尚盤薄媚
狐言語巧天鳥聲音惡憑此爲巢穴往來互棲託四傍
五六本枝葉相交錯借問因何生秋風吹子落爲長社
壇下無人敢芟斲幾度野火來風迴燒不着

有木香苒苒山頭生一發主人不知名移種近軒闥愛
其有芳味因以調麪蘖前後曾飲者十人無一活豈徒
悔封植兼亦誤采掇試問識藥人始知名野葛年深已
滋蔓刀斧不可伐何時猛風來爲我連枝拔

有木名水榿遠望青童童根株非勁挺柯葉多蒙籠彩
翠色如栢鱗皴皮似松爲同松栢類得列嘉樹中枝弱
不勝雪勢高常懼風雪壓低還舉風吹西復東柔芳甚
楊柳早落先梧桐惟有一堪賞中心無蠹蟲

有木名凌霄擢秀非孤標偶依一株樹遂抽百尺條託
根附樹身開花寄樹梢自謂得其勢無因有動搖一旦
樹摧倒獨立暫飄飄疾風從東起吹折不終朝朝爲拂

雲花暮爲委地樵寄言立身者勿學柔弱苗

有木名丹桂四時香馥馥花團夜雪明葉剪春雲綠風
影清似水霜枝冷如玉獨占小山幽不容凡鳥宿匠人
愛芳直裁截爲厦屋榦細力未成用之君自速重任雖
大過直心終不曲縱非梁棟材猶勝尋常木

青塚

上有飢雁號下有枯蓬走茫茫邊雪裏一掬沙培塿傳
是昭君墓埋閉蛾眉久凝脂化爲泥鉛黛復何有時有
陰怨氣常生墳左右鬱鬱如苦霧不隨骨銷朽婦人無
他才榮枯繫妍否何乃明妃命獨懸畫工手丹青一註
誤白黑相紛紜遂使君眼中西施作嫫母同儕傾寵幸

異類爲配偶禍福安可知美顏不如醜何言一時事可
戒千年後特報後來姝不須倚眉首無辭插荆釵嫁作
貧家婦不見青塚上行人爲澆酒

常樂里閒居偶題十六韻兼寄劉十五公與王十

一起呂二舅呂四頰崔十八元亮元九稹劉三
十二敦質張十五仲元時爲校書郎

帝都名利場雞鳴無安居獨有懶慢者日高頭未梳工
拙性不同進退迹遂殊幸逢太平代天子好文儒小才
難大用典校在秘書三旬兩入省因得養頑疎茅屋四
五間一馬二僕夫俸錢萬六千月給亦有餘旣無衣食
牽亦少人事拘遂使少年心日日常晏如勿言無知已

躁靜各有徒蘭臺七八人出處與之俱旬時阻談笑旦
夕望軒車誰能讎校間解帶卧吾廬窓前有竹翫門外
有酒沽何以待君子數竿對一壺

荅元八宗簡同遊曲江後明日見贈

長安千萬人出門各有營唯我與夫子信馬悠悠行行
到曲江頭反照草樹明南山好顏色病客有心情水禽
翻白羽風荷嫋翠莖何必滄浪去即此可濯纓時景不
重來賞心難再并坐愁紅塵裏夕鼓鼙聲歸來經一
宿世慮稍復生賴聞瑤華唱再得塵襟清

松聲

修竹里張家
宅南亭作

月好好獨坐雙松在前軒西南微風來潛入枝葉間蕭

寥發爲聲半夜明月前寒山颯颯雨秋琴泠泠絃一聞
滌炎暑再聽破昏煩竟夕遂不寐心體俱翛然南陌車
馬動西隣歌吹繁誰知茲簷下滿耳不爲喧

寄李十建

外事牽我形外物誘我情李君別來久褊恡從中生憶
昨訪君時立馬扣柴荆有時君未起稚子喜先迎連步
笑出門衣翻冠或傾掃堦苔紋綠拂榻藤陰清家醞及
春熟園葵乘露烹看山東亭坐待月南原行門靜惟鳥
語坊遠少鼓聲相對盡日言不及利與名分手來幾時
明月三四盈別時殘花落及此新蟬鳴芳歲忽已晚離
抱悵未平豈不思命駕吏職坐相縈前時君有期訪我

來山城心賞久云阻言約無自輕相去幸非遠走馬一
日程

禁中曉卧因懷王起居

遲日禁漏盡悄悄暝鴉喧夜雨槐花落微涼卧北軒曙
燈殘未滅風簾間自翻每得一靜境思與故人言

禁中偶直夢遊仙遊寺

西軒草詔暇松竹深寂寂月出清風來忽是山中夕因
成西南夢夢作遊仙客覺聞宮漏聲猶謂山泉滴

秋山

久病曠心賞今朝一登山山秋雲物冷稱我清羸顏白
石卧可枕青蘿行可攀意中如有得盡日不欲還人生

無幾何如寄天地間心有千載憂身無一日閒何時解
塵網此地來掩關

效陶潛體詩

并序

余退居渭上杜門不出時屬多雨無以自娛會
家醞新熟雨中獨飲往往酣醉終日不醒懶放
之心彌覺自得故得於此而有以忘於彼者因
詠陶淵明詩適與意會遂倣其體成十六篇醉
中狂言醒輒自哂然知我者亦無隱焉今錄九篇
翳翳踰月陰沉沉連日雨開簾望天色黃雲暗如土行
潦毀我墉疾風壞我宇蓬莠生庭院泥塗失場圃邨溪
絕賓客窓晦無儔侶盡日不下牀跳鼃時入戶出門無

所往入室還獨處不以酒自娛塊然與誰語

朝飲一杯酒冥心合元化兀然無所思日高尚閒卧暮
讀一卷書會意如嘉話欣然有所遇夜深猶獨坐又得
琴上趣安絃有餘暇復得詩中狂下筆不能罷惟茲三
四事特用度晝夜所以陰雨中經旬不出舍始悟獨住
人心安時亦過

東家采桑婦雨來苦愁悲簇蠶北堂前雨冷不成絲西
家荷鋤叟雨來亦怨咨種豆南山下雨多落爲箕而我
獨何幸醞酒本無期及此多雨日正遇新熟時開瓶瀉
樽中玉液黃金脂持翫已可悅歡嘗有餘滋一酌發好
容再酌開愁眉速進四五酌酣暢入四肢忽然遺我物

誰復分是非是時連夕雨醅酏無所知人心苦顛倒反
爲憂者嗤

天秋無片雲地靜無纖塵團團新晴月林下生白輪憶
昨陰霖天連連三四旬賴逢家醞熟不覺過朝昏私言
雨霽後可以罷餘樽及對新月色不醉亦愁人牀頭殘
酒盞欲盡味彌淳攜置南簷下舉酌自殷勤清光入盃
杓白露生衣巾乃知陰與晴安可無此君我有樂府詩
成來人未聞今宵醉有興狂詠驚四鄰獨賞猶復爾何
況有交親

中秋三五夜明月在前軒臨觴忽不飲憶我平生歡我
有同心人邈邈崔與錢我有忘形友迢迢李與元或飛
青雲上或落江湖間與我不相見于今三四年我無縮
地術君非馭風仙安得明月下四人來晤言良夜信難
得佳期杳無緣明月又不住漸下西南天豈無他時會
惜此清景前

家醞飲已盡村中無酒沽坐愁今夜醒其奈秋懷何有
客忽叩門言語一何佳云是南村叟挈榼來相過且喜
樽不燥安問少與多重陽雖已過籬菊有殘花歡來苦
晝短不覺夕陽斜老人勿遽起且待新月華客去有餘
趣竟夕獨酣歌

原生衣百結顏子食一簞歡然樂其志有以忘飢寒今
我何人哉德不比先賢衣食幸相屬胡爲不自安況茲

清渭曲居處安且閒榆柳百餘樹茅茨數十間寒負簷
下日熱濯澗底泉日出猶未起日入已復眠西風滿村
巷清涼八月天但有雞犬聲不聞車馬喧時傾一樽酒
坐望東南山稚姪初學步牽衣戲我前即此自可樂庶
幾顏與原

煙霞隔元圃風波限瀛洲我豈不欲往大海路阻修神
仙但聞說靈藥不可求長生無得者舉世如蜉蝣逝者
不重迴存者難久留踟躕未死間何苦懷百憂念此忽
內熱坐看成白頭舉杯還獨飲顧影自獻酬心與口相
約未醉勿言休今朝不盡醉知有明朝不見郭門外
纍纍墳與丘明月愁殺人黃蒿風颼颼死者若有知悔

不乘燭遊

吾聞潯陽郡昔有陶徵君愛酒不愛名憂醒不憂貧嘗
爲彭澤令在官纔八旬愀然忽不樂掛印著公門口吟
歸去來頭戴漉酒巾人吏留不得直入故山雲歸來五
柳下還以酒養真人間榮與利擺落如泥塵先生去已
久紙墨有遺文篇篇勸我飲此外無所云我從老大來
竊慕其爲人其他不可及且傲醉昏昏

渭上偶釣

渭水如鏡色中有鯉與魴偶持一竿竹懸釣在其傍微
風吹釣絲嫋嫋十尺長身雖對魚坐心在無何鄉昔有
白頭人亦釣此渭陽釣人不釣魚七十得文王況我垂

釣意人魚亦兼忘無機兩不得但弄秋水光興盡釣亦罷歸來飲我觴

春眠

新浴肢體暢獨寢神魄安況因夜深坐遂成日高眠春被薄亦暖朝窓深更閒却忘人間事似得枕上仙至適無夢想大和難名言全勝彭澤醉欲敵曹溪禪何物呼我覺伯勞聲關闕起來妻子笑生計春茫然

晚春沽酒

百花落如雪兩鬢垂作絲春去有來日我老無少時人生待富貴爲樂常苦遲不如貧賤日隨分開愁眉賣我所乘馬典我舊朝衣盡將沽酒飲酩酊步行歸名姓日

隱晦形骸日變衰醉卧黃公肆人知我是誰

秋遊原上

七月行已半早涼天氣清清晨起巾櫛徐步出柴荆露杖筇竹冷風襟越蕉輕閒攜弟姪輩同上秋原行新棗未全赤晚瓜有餘馨依依田家叟設此相逢迎自我到此邨往來白髮生村中相識久老幼皆有情留連向暮歸樹樹風蟬鳴是時新雨足禾黍夾道青見此令人飽何必待西成

東園翫菊

少年昨已去芳歲今又闌如何寂寞意復此荒涼園園中獨立久日淡風露寒秋蔬盡蕪沒好樹亦凋殘惟有

數叢菊新開籬落間
攜觴聊就酌爲爾一留連
憶我少小日易爲興所牽
見酒無時節未飲心欣然
近從年長來漸覺取樂難
常恐更衰老強飲亦無歡
顧謂爾菊花後時何獨鮮
誠知不爲我借爾暫開顏

觀稼

世役不我牽身心常自若
晚出看田畝閒行傍村落
纍纍繞場稼嘖嘖羣飛雀
年豐豈獨人禽鳥聲亦樂
田翁逢我喜默起具杯杓
斂手笑相延社酒有殘酌
愧茲勤且敬藜杖爲淹泊
言動任天真未覺農人惡
停杯問生事夫種妻兒獲
筋力苦疲勞衣食常單薄
自慙祿仕者不曾營農作
飽食無所勞何殊衛人鶴

冬夜

家貧親愛散身病交遊罷
眼前無一人獨掩村齋卧
冷落燈火闇離披簾幕破
策策窓戶前又聞新雪下
長年漸省睡夜半起端坐
不學坐忘心寂寞安可過
兀然身寄世浩然心委化
如此來四年一千三百夜

遊悟貞寺詩

一百三十韻

元和九年秋八月月上弦
我遊悟貞寺寺在王順山
去山四五里先聞水潺湲
自茲捨車馬始步藍溪灣
手拄青竹杖足躅白石灘
漸怪耳目曠不聞人世喧
山下望山上初疑不可攀
誰知中有路盤折通巖巔
一息幡竿下再休石龕邊
龕間長文餘門戶無扃關
仰窺不見人

石髮垂若鬢驚出白蝙蝠雙飛如雪翻回首寺門望青
崖夾朱軒如擘山腹開置寺于其間入門無平地地窄
虛空寬房廊與臺殿高下隨峯巒巖萼無撮土樹木多
瘦堅根株抱石長屈曲蟲蛇蟠松桂亂無行四時鬱芊
芊枝梢嫋青翠韻若風中絃日月光不透綠陰相交延
幽鳥時一聲聞之似寒蟬首憩賓位亭就坐未及安須
臾開北戶萬里明豁然拂檐虹霏微遶棟雲回旋赤日
間白雨陰晴同一川野綠簇草樹眼界吞秦原渭水細
不見漢陵小于拳却顧來時路縈紆映朱欄歷歷上山
人一一遙可觀前對多寶塔風鐸鳴四端藥爐與戶牖
恰恰金碧繁云昔伽葉佛此地坐涅槃至今鐵鉢在當

底手迹穿西開玉像殿白佛森比肩抖擻塵埃衣禮拜
冰雪顏疊霜爲袈裟貫電爲華鬘逼觀疑鬼功其跡非
雕鐫次登觀音堂未到聞梅檀上堦脫雙履斂足升瑤
筵六楹排玉鏡四座敷金鈿黑夜自光明不待燈燭然
衆寶互低昂碧佩珊瑚幡風來似天樂相觸聲珊珊白
珠垂露凝赤珠滴血殷點綴佛髻上合爲七寶冠雙瓶
白琉璃色若秋水寒隔瓶見舍利圓轉如金丹玉笛何
代物天人施祇園吹如秋鶴聲可以降靈仙是時秋方
中三五月正圓寶堂豁三門金魄當其前月與寶相射
晶光爭鮮妍照人心骨冷竟夕不欲眠曉尋南塔路亂
竹低嬋娟幽不逢人寒蝶飛翩翩山果不識名離離

夾道蕃足以療飢乏摘嘗味甘酸道南藍谷神紫傘白
紙錢若歲有水旱詔使修蘋蘩以地清淨故獻奠無葷
羶危石疊四五崑崙欹且剏造物者何意堆在巖東偏
冷滑無人跡苔點如花牋我來登上頭下臨不測淵目
眩手足掉不敢低頭看風從石下生薄人而上搏衣服
似羽翻開張欲飛騫巒巒三面峯峰尖刀劍攢悠悠白
雲過決開露青天西北日落時夕暉紅團團千里翠屏
外走下丹砂丸東南月上時夜氣青漫漫百丈碧潭底
寫出黃金盤藍水色似藍日夜長潺潺周迴繞山轉下
視如青環或鋪爲慢流或激爲奔湍泓澄最深處浮出
蛟龍涎側身入其中懸磴猶險難捫蘿蹋樛木下逐飲

澗猿雪迸起白鷺錦跳驚紅鱸歇定方盥漱濯去支體
煩淺深皆洞徹可照腦與肝但愛清見底欲尋不知源
東崖饒怪石積甃蒼琅玕溫潤發于外其間韞璵璠卞
和死已久良玉多棄捐或時洩光彩夜雨星月連中頂
最高峰拄天青玉竿颯飈音同上不得豈我能扳援上有
白蓮池紫葩覆清瀾聞名不可到處所非人寰又有一
片石大如方尺輒插在半壁上其下萬仞懸云有過去
師坐得無生禪號爲定心石長老世所傳却上謁仙祠
蔓草生綿綿昔聞王氏子羽化升上元其西曬藥臺猶
對芝朮田時復明月夜上聞黃鶴言迴尋畫龍堂二叟
鬚髮斑想見聽法時歡喜禮印壇復歸泉窟下化作龍

蜿蜒階前石孔在欲雨生白煙往有寫經僧身靜心精
專感彼雲外鶴羣飛千翩翩來添硯中水去吸巖下泉
一日三往復時節長不憊經成號聖僧弟子名揚難誦
此蓮花偈數滿百億千身壞口不壞舌根如紅蓮顱骨
今不見石函尚存焉粉壁有吳畫筆彩依舊鮮素屏有
褚書墨色如新乾名境與異跡周覽無不殫一遊五晝
夜欲返仍盤桓我本山人誤爲時網牽牽率使讀書
推挽令做官旣登文字科又忝諫諍負倔直不合時無
盆同素餐以此自慙惕戚戚常寡歡無成心力盡未老
形骸殘今來脫簪組始覺離憂患及爲山水遊彌得縱
疎頑野麋斷羈絆行走無拘攣池魚放入海一往何時

還身著居士衣手把南華篇終來此山住永謝區中緣
我今四十餘從此終身閒若以七十期猶得三十年

酬張十八訪宿見贈

昔我爲近臣君常稀到門今我官職冷唯君來往頻我
受狷介性立爲頑拙身平生雖寡合合即無緇磷況君
秉高義富貴視如雲五侯三相家眼冷不見君問其所
與游獨言韓舍人其次即及我我愧非其倫胡爲謬相
愛歲晚逾勤勤落然頽簷下一話夜達晨牀單食味薄
亦不嫌我貧日高上馬去相顧猶逡巡長安久無雨日
赤風昏昏憐君將病眼爲我犯埃塵遠從延康里來訪
曲江濱所重君子道不獨愧相親

朝歸書寄元八

進入閣前拜退就廊下
飡歸來昭國里人卧馬歇鞍却
睡至日午起坐心浩然
況當好時節雨後清和天
柿樹綠陰合王家庭院寬
瓶中鄆縣酒牆上終南山
獨眠仍獨坐開襟當風前
禪僧與詩客次第來相看
要語連夜語須眠終日眠
除非奉朝謁此外無別牽
年長身且健官貧心甚安
幸無急病痛不至苦飢寒
自此聊以適外緣不能干
惟爲靜者信難爲動者言
臺中元侍御早晚作郎官
未作郎官際無人相伴閒

酬吳七見寄

曲江有病者尋常多掩關
又聞馬死來不出身更閒聞

有送書者自起出門看
素緘署丹字中有瓊瑤篇
口吟耳自聽當暑忽翛然
似漱寒玉冰如聞商風絃
首章歎時節末句思笑言
懶慢不相訪隔街如隔山
嘗聞陶潛語心遠地自偏
君住安邑里左右車徒喧
竹葉閉溪院琴樽開小軒
誰知市南地轉作壺中天
君本上清人名在石堂間
不知有何過謫作人間
仙常恐歲月滿飄然歸紫煙
莫忘蟬蛸內進士有同年

舟行江州路上作

帆影日漸高閒眠猶未起
起問鼓枻人已行三十里
船頭有行竈炊稻烹紅鯉
飽食起婆娑盃盞激秋江
水平生滄浪意一旦來遊
此何況不失家舟中載妻子

御定全唐詩錄卷第五十九

Blank space for the text of the poems in this section.

御定全唐詩錄卷第六十

禮部侍郎臣徐倬翰林院侍讀學士臣徐元正奉

旨校刊

白居易 三

古體詩 三

訪陶公舊宅 并序

予夙慕陶淵明為人往歲渭川閒居常有倣陶
體詩十六首今遊廬山經柴桑過栗里思其人
訪其宅不能默默又題此詩云

垢塵不污玉靈鳳不啄羶嗚呼陶靖節生彼晉宋間心
實有所守口終不能言永惟孤竹子拂衣首陽山夷齊

各一身窮餓未爲難先生有五男與之同饑寒腸中食
不充身上衣不完連徵竟不起斯可謂真賢我生君之
後相去五百年每讀五柳傳目想心拳昔嘗詠遺風
著爲十六篇今來訪故宅森若君在前不慕樽有酒不
慕琴無絃慕君遺榮利老死此丘園柴桑古邨落栗里
舊山川不見籬下菊但餘墟中煙子孫雖無聞族氏猶
未遷每逢姓陶人使我心依然

北亭

廬宮山下州湓浦沙邊宅宅北倚高岡迢迢數千尺上
有青青竹竹間多白石茅亭居上頭豁達門四闢前楹
捲簾箔北牖施牀席江風萬里來吹我涼淅淅日高公

府歸巾笏隨手擲脫衣恣搔首坐卧任所適時傾一杯
酒曠望湖天夕口詠獨酌謠目送歸飛翮慙無出塵操
未免折腰役偶獲此閒居謬似高人跡

游湓水

四月未全熟麥涼江風秋湖山處處好最愛湓水頭湓
水從東來一派入江流可憐似縈帶中有隨風舟命酒
一臨汎捨鞍揚棹謳放迴舛傷馬去逐波間鷗煙浪始
渺渺風襟亦悠悠初疑上河漢中若尋瀛洲汀樹綠拂
池沙草芳未休青蘿與紫葛枝蔓垂相樛繫纜步平舛
回頭望江州城雉映水見隱隱如蜃樓日入意未盡將
歸復少留到官行半歲今日方一遊此地來何暮可以

寫吾憂

宿簡寂觀

巖白雲尚屯林紅葉初墮秋光引閒步不知身遠近夕
投靈洞宿卧覺塵機泯名利心既忘市朝夢亦盡暫來
尚如此况乃終身隱何以療夜饑一匙雲母粉

睡起晏坐

後亭晝眠足起坐春景暮新覺眼猶昏無思心正住淡
寂歸一性虛閒遺萬慮了然此時心無物可譬喻本是
無有鄉亦名不用處行禪與坐忘同歸無異路

過李生

蘋小蒲葉短南湖春水生子近湖邊住靜境稱高情我

為郡司馬散拙無所營使君知性野衙退任閒行行攜
小榼去逢花輒獨傾半酣到子舍下馬扣柴荆何以引
我步繞籬竹萬莖何以醒我酒吳音吟一聲須臾進野
飯飯稻茹芹莢白甌青竹筍儉潔無羶腥欲去復徘徊
夕鴉已飛鳴何當重遊此待君湖水平

食笋

此州乃竹鄉春笋滿山谷山夫折盈抱抱來早市鬻物
以多為賤雙錢易一束置之炊甑中與飯同時熟紫箨
拆故錦素肌擘新玉每食遂加飧經旬不思肉久為京
洛客此味常不足且食勿踟躕南風吹作竹

香爐峰下新置草堂即事詠懷題於石上

香爐峰北面遺愛寺西偏白石何鑿鑿清流亦潺潺有
松數十株有竹千餘竿松張翠傘蓋竹倚青琅玕其下
無人居悠哉多歲年有時聚猿鳥終日空風煙時有沉
冥子姓白字樂天平生無所好見此心依然如獲終老
地忽乎不知遷架巖結茅宇斲壑開茶園何以洗我耳
屋頭飛落泉何以洗我眼砌下生白蓮左手攜一壺右
手挈五絃傲然意自足箕踞於其間興酣仰天歌歌中
聊寄言言我本野夫誤爲世網牽時來昔捧日老去今
歸山倦鳥得茂樹涸魚反清源捨此欲焉往人間多險
艱

草堂前開一池養魚種荷日有幽趣

淙淙三峽水浩浩萬頃陂未如新塘上微風動漣漪小
萍加汎汎初蒲正離離紅鯉二三寸白蓮八九枝遶水
欲成徑護堤方插籬已被山中客呼作白家池

登香爐峰

迢迢香爐峰心存耳目想終年牽物役今日方一往攀
蘿躡危石手足勞俯仰同遊三四人兩人不敢上上到
峰之頂目眩心怳怳高低有萬尋濶狹無數丈不窮視
聽界焉識宇宙廣江水細如繩湓城小於掌紛吾何屑
屑未能脫塵鞅歸去思自嗟低頭入蟻壤

弄龜羅

有姪始六歲字之爲阿龜有女生三年其名曰羅兒一

始學笑語一能誦歌詩朝戲抱我足夜眠枕我衣汝生
何其晚我年行已衰物情小可念人意老多慈酒美竟
須壞月圓終有虧亦如恩愛緣乃是憂惱資舉世同此
累吾安能去之

截樹

種樹當前軒樹高柯葉繁惜哉遠山色隱此蒙龍間一
朝持斧斤手自截其端萬葉落頭上千峰來面前忽似
決雲霧豁達觀青天又如所念人久別一歎顏始有清
風至稍見飛鳥還開懷東南望目遠心遠然人各有偏
好物莫能兩全豈不愛柔條不如見青山

題座隅

手不任執爰肩不能荷鋤量力揆所用曾不敵一夫幸
因筆硯功得升仕進途歷官凡五六祿俸及妻孥左右
有兼僕出入有單車自奉雖不厚亦不至饑飭若有人
及此傍觀為何如雖賢亦為幸况我鄙且愚伯夷古賢
人魯山亦其徒時哉無奈何俱化為饑殍念彼益自愧
不敢忘斯須平生榮利心破滅無遺餘猶恐塵妄起題
此於座隅

贖雞

清晨臨江望水禽正誼繁鳧雁與鷗鷺游颺戲朝暎適
有鬻雞者挈之來遠村飛鳴彼何樂窘束此何冤喔喔
十四雛罩縛同一樊足傷金距踏頭搶花冠翻經宿費

飲啄日高詣屠門遲迴未死間饑渴欲相吞常慕古人
道仁信及魚豚見茲生惻隱贖放雙林園開籠解索時
雞雞聽我言與爾鎡三百小惠何足論莫學啣環雀崎
嶇謾報恩

秋日懷杓直

時杓直出
牧澧州

晚來天色好獨出江邊步憶與李舍人曲江相近住常
云遇清景必約同幽趣若不訪我來還須覓君去開眉
笑相見把手期何處西寺老胡僧南園亂松樹攜持小
酒榼吟詠新詩句同出復同歸從朝直至暮風雨忽消
散江山眇回互潯陽與涪陽相望空雲霧心期自乖曠
時景還如故今日郡齋中秋光誰共度

對酒示行簡

今日一樽酒歡暢何怡怡此樂從中來他人安得知兄
弟惟二人遠別恒苦悲今春自巴峽萬里平安歸復有
雙幼妹笄年未結褵昨日嫁娶畢良人皆可依憂念兩
消釋如刀斷羈縻身輕心無繫忽欲凌空飛人生苟有
累食肉常如饑我心既無苦飲水亦可肥行簡勸爾酒
停杯聽我辭不歎鄉國遠不嫌官祿微但願我與爾終
老不相離

長慶二年七月自中書舍人出守杭州路次藍溪

作

太原一男子自顧庸且鄙老逢不次恩洗拔出泥滓既

居可言地願助朝廷理伏閣三上章戇愚不稱旨聖人
存大體優貸容不死鳳詔停舍人魚書除刺史寘懷齊
寵辱委順隨行止我自得此心于茲十年矣餘杭乃名
郡郡郭臨江汜已想海門山潮聲來入耳昔予貞元末
羈旅曾遊此甚覺太守尊亦諳魚酒美因生江海興每
羨滄浪水尚擬拂衣行况今兼祿仕青山峰巒接白日
煙塵起東道既不通改轅遂南指自秦窮楚越浩蕩五
千里聞有賢主人而多好山水是行頗為愜所歷良可
紀策馬渡藍溪勝遊從此始

初出城留別

朝從紫禁歸暮出青門去勿言城東陌便是江南路揚

鞭簇車馬揮手辭親故我生本無鄉心安是歸處

自望秦赴五松驛馬上偶睡睡覺成吟

長途發已久前館行未至體倦目已昏瞋然遂成睡右
袂尚垂鞭左手暫委轡忽覺問僕夫纔行百步地形神
分處所遲速相乖異馬上幾多時夢中無限事誠哉達
人語百齡同一寐

鄧州路中作

蕭蕭誰家邨秋梨葉半拆漠漠誰家園秋韭花初白路
逢故里物使我嗟行役不歸渭北村又作江南客去鄉
徒自苦濟世終無益自問波上萍何如澗中石

山路偶興

筋力未全衰僕馬不至弱又多山水趣心賞非寂寞捫
蘿上煙嶺蹋石穿雲壑谷鳥晚仍啼洞花秋不落提籠
復攜榼遇勝時停泊泉憩茶數甌嵐行酒一酌獨吟還
獨笑此興殊未惡假使在城時終年有何樂

初領郡政衙退登東樓作

鯁惲心所念簡牘手自操何言符竹貴未免州縣勞賴
是餘杭郡臺榭遠官曹凌晨親政事向晚恣遊遨山冷
微有雪波平未生濤水心如鏡面千里無纖毫直下江
最濶近東樓更高煩襟與滯念一望皆遁逃

郡亭

平旦起視事亭午卧掩關除親簿領外多在琴書前况

有虛白亭坐見海門山潮來一凭檻賓至一開筵終朝
對雲水有時聽管絃持此聊過日非忙亦非閒山林太
寂寞朝闕空喧煩惟茲郡閣內囂靜得中間

郡中即事

漫漫潮初平熙熙春日空濶遠江山晴明好天氣外
有適意物中無繫心事數篇對竹吟一杯望雲醉行攜
杖扶力卧讀書取睡久養病形骸深諳閒氣味遙思九
城陌擾擾趨名利今朝是雙日朝謁多軒騎寵者防悔
尤權者懷憂畏為報高車蓋恐非真富貴

郡齋暇日辱常州陳郎中使君早春晚坐水西館

書事詩十六韻見寄亦以十六韻酬之

新年多暇日晏起褰簾坐睡足心更慵日高頭未裹徐
傾下藥酒稍藝煎茶火誰伴寂寥身無絃琴在左遙思
毘陵官春深物嫋娜波拂黃柳梢風搖白梅朶衙門排
曉戟鈴閣開朝鎖太守水西來朱衣垂素舸良辰不易
得佳會無由果五馬正相望雙魚忽前隨魚中獲瑰寶
持翫何磊砢只我一百六十言字字靈珠顆上申心款曲下
敘時轆軻切才富不如君道孤還似我敢辭官遠慢且
貴身安妥勿復問榮枯冥心無不可

官舍

高樹換新葉陰陰覆地隅何言太守宅有似幽人居太
守卧其下閒慵兩有餘起嘗一甌茗行讀一卷書早梅

結青實殘櫻落紅珠稚女弄庭果嬉戲牽人裾是日晚
彌靜巢禽不相呼嘖嘖護兒鵲啞啞母子烏豈惟云烏
爾吾亦引吾雛

吾雛

吾雛字阿羅阿羅纔七齡嗟吾不才子憐爾無弟兄撫
養雖驕駭性識頗聰明學母畫眉樣效吾詠詩聲我齒
今欲隨汝齒昨始生我頭髮盡落汝頂髻初成老幼不
相待父哀汝孩嬰緬想古人心慈愛亦不輕蔡邕念文
姬于公歎緹縈敢求得汝力但未忘父情

題小橋前新竹招客

鴈齒小紅橋垂簷低白屋橋前何所有苒苒新生竹皮

開拆褐錦節露抽青玉筠翠如可殮粉霜不忍觸閒吟
聲未已幽翫心難足管領好風煙輕欺凡草木誰能有
月夜伴我林中宿為君傾一杯狂歌竹枝曲

病中逢秋招客夜酌

不見詩酒客卧來半月餘合和新藥草尋檢舊方書晚
霽煙景度早涼窓戶虛雪生哀髻久秋入病心初卧簟
蘄竹涼風襟叩葛疎夜來身較健小飲復何如

除官去未閒

除官去未閒半月恣遊討朝尋霞外寺暮宿波上島新
樹少於松平湖半連草躋攀有次第賞翫無昏早有時
騎馬醉兀兀冥天造窮通與生死其奈吾懷抱江山信

為美齒髮行將老在郡誠未厭歸鄉去亦好

洛下卜居

三年典郡歸所得非金帛天竺石兩片華亭鶴一隻飲
啄供稻梁包裹用茵席誠知是勞費其奈心愛惜遠從
餘杭郭同到洛陽陌下擔拂雲根開籠展霜翮貞姿不
可雜高性宜其適遂就無塵坊仍求有水宅東南得幽
境樹老寒泉碧池畔多竹陰門前少人跡未請中庶祿
且脫雙驂易買履道宅價不足
因以兩馬償之豈獨為身謀安吾鶴與石

自詠

夜鏡隱白髮朝酒發紅顏可憐假年少自笑須臾間朱
砂賤如土不解燒為丹元髻化為雪未聞休得官咄哉

箇丈夫心性何情頑但遇詩與酒便忘寢與餐高聲發
一吟似得詩中仙引滿飲一杯盡忘身外緣昔有醉先
生席地而幕天於今居處在許我當中眠眠罷又一酌
酌罷又一篇回面顧妻子生計方落然誠知此事非又
過知非年豈不欲自改改即心不安且向安處去其餘
皆老閒

晏起

鳥鳴庭樹上日照屋簷時老去慵轉極寒來起猶遲厚
薄被適性高低枕得宜神安體穩暖此味何人知睡足
仰頭坐兀然無所思如未鑿七竅若都遺四肢緬想長
安客早朝霜滿衣彼此各自適不知誰是非

春葺新居

江州司馬日忠州刺史時栽松滿後院種柳蔭前墀彼
皆非吾土栽種尚忘疲况茲是我宅葺藝固其宜平旦
領僕使乘春親指揮移花夾暖室徙竹覆寒池池水變
綠色池芳動清輝尋芳弄水坐盡日心熙熙一物苟可
適萬緣都若遺設如宅門外有事吾不知

泛春池

白蘋湘渚曲綠篠剡溪口各在天一涯信美非吾有如
何此庭內水竹交左右霜竹百千竿煙波六七畝泓澄
動堦砌淡泞映戶牖蛇皮細有紋鏡面清無垢主人
過橋來雙童扶一叟恐污清冷波塵纓先抖擻波上一

葉舟舟中一樽酒酒開舟不繫去去隨所偶或遶蒲浦
前或泊桃島後未撥落杯花低衝拂面柳半酣迷所在
倚榜兀回首不知此何處復是人寰否誰知始疏鑿幾
主相傳受楊家去云遠田氏將非久天與愛水人終焉
落吾手

此池始楊常侍開鑿中間田氏為主
予今有之蒲浦桃島皆池上所有

新栽竹

佐邑意不適閉門秋草生何以娛野性種竹百餘莖見
此溪上色憶得山中情有時公事暇盡日遶欄行勿言
根未固勿言陰未成已覺庭宇內稍稍有餘清最愛近
窓卧秋風枝有聲

寄江南兄弟

分散骨肉戀趨馳名利牽一奔塵埃馬一汎風波船忽
憶分手時憫然秋風前別來朝復夕積日成七年花落
城中池春深江上天登樓東南望烏滅煙蒼然相去復
幾許道里近三千平地猶難見况乃隔山川

寄題盤屋廳前雙松

兩松自仙遊
山移植縣廳

憶昨爲吏日折腰多苦辛歸家不自適無計慰心神手
栽兩樹松聊以當嘉賓春來日一往生意漸欣欣清韻
度秋在綠茸隨日新始憐澗底色不憶城中春有時晝
掩關雙影對一身盡日不寂寞意中如三人忽奉宣室
詔徵爲文苑臣閒來一惆悵長似別交親早知煙翠前
攀翫不逡巡悔從白雲裏移爾落囂塵

別元九後詠所懷

零落桐葉雨蕭條槿花風悠悠早秋意生此幽閒中况
與故人別中懷正無悰勿云不相送心到青門東相知
豈在多但問同不同同心一人去坐覺長安空

早秋曲江感懷

離離暑雲散嫋嫋涼風起池上秋又來荷花半成子朱
顏易消歇白日無窮已人壽不如山年光急於水青蕪
與紅蓼歲歲秋相似去歲此悲秋今我復來此

寄元九

身為近密拘心為名檢縛月夜與花時少逢杯酒樂唯
有元夫子閒來同一酌把手或酣歌展眉時笑謔今春

除御史前月之東洛別來未開顏塵埃滿樽杓蕙風晚
香盡槐雨餘花落秋意一蕭條離容兩寂寞况隨白日
老共負青山約誰識相念心羈鷹與籠鶴

別舍弟後月夜

悄悄初別後去住兩盤桓行子孤燈店居人明月軒平
生共貧苦未必日成歡及此暫為別懷抱已憂煩况是
庭葉盡復思山路寒如何不為念馬瘦衣裳單

勸酒寄元九

薤葉有朝露槿枝無宿花君今亦如此促促生有涯既
不逐禪僧林下學楞伽又不隨道士山中煉丹砂百年
夜分半一歲春無多何不飲美酒胡然自悲嗟俗號消

愁藥神速無以加一杯驅世慮兩杯反天和三杯即醕
酌或笑任狂歌陶陶復兀兀吾孰知其他况在名利途
平生有風波深心藏陷窳巧言織網羅舉目非不見不
醉欲如何

曲江感秋

沙草新雨地岼桺涼風枝三年感秋思併在曲江池早
蟬已嘹唳晚荷復離披前秋去秋思一一生此時昔人
三十二秋興已云悲我今欲四十秋懷亦可知歲月不
虛設此身隨日衰闇老不自覺直到髻成絲

酬張太祝晚秋卧病見寄

高才淹禮寺短羽翔禁林西街居處遠北闕官曹深君

病不來訪我忙難往尋差池終日別寥落經年心露濕
綠蕪地月寒紅樹陰况茲獨愁夕聞彼相思吟上言歡
笑阻下嗟時歲侵容衰晚牕鏡思苦秋絃琴一章錦繡
段八韻瓊瑤音何以報珍重慙無雙南金

早朝賀雪寄陳山人

長安盈尺雪早朝賀君喜將赴銀臺門始出新昌里上
堤馬蹄滑中路蠟燭死十里向北行寒風吹破耳待漏
午門外候對三殿裏鬚髻凍生水衣裳冷如水忽思仙
遊谷闇謝陳居士暖覆褐裘眠日高應未起

初與元九別後忽夢見之及寤而書適至兼寄桐

花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜
雲四散千里同月色曉來夢見君應是君相憶夢中握
君手問君意何如君言苦相憶無人可寄書覺來未及
說叩門聲藪藪言是商州使送君書一封枕上忽驚起
顛倒着衣裳開絨見手扎一紙十三行上論遷謫心下
說離別腸心腸都未盡不暇敘炎涼云作此書夜夜宿
商州東獨對孤燈坐陽城山館中夜深作書畢山月向
西斜月前何所有一樹紫桐花桐花半落時復道正相
思殷勤書背後兼寄桐花詩桐花詩八韻思緒一何深
以我今朝意憶君此夜心一章一遍讀一句十回吟珍

重八十字字字化為金

重到渭江舊居

舊居清渭曲開門當蔡渡十年方一還幾欲迷歸路追
思昔日行感傷故游處挿柳作高林種桃成老樹因驚
成人者盡是舊童孺試問舊老人半為遶村墓浮生同
過客前後遞來去白日如弄珠出入光不住人物日改
變舉目悲所遇回念念我身安得不哀暮朱顏消不歇
白髮生無數惟有山門外三峰色如故

白髮

白髮知時節聞與我有期今朝日陽裏梳落數莖絲家
人不慣見憫默為我悲我云何足恠此意爾不知凡人

年三十外壯中已衰但思寢食味已減二十時况我年
四十本來形貌羸書魔昏兩眼酒病沉四肢親愛日零
落在者仍別離身心久如此白髮生已遲由來生老死
二病長相隨除却念無生人間無藥治

酬李少府曹長官舍見贈

低腰復斂手心體不違安一落風塵下始知為吏難公
事與日長宦情隨歲闌惆悵青袍袖芸香無半殘賴有
李夫子此懷聊自寬兩心如止水彼此無波瀾徃徃簿
書暇相勸強為歡白馬晚蹋雪綠觴春暖寒戀月夜同
宿愛山晴可看野性自相近不是為同官

曉別

曉鼓聲已半離筵坐難久請君斷腸歌送我和淚酒月
落欲明前馬嘶初別後浩浩闇塵中何由見回首

北園

北園東風起雜花次第開心知須臾落一日三四來花
下豈無酒欲酌復遲迴所思眇千里誰勸我一杯

秋月

夜初色蒼然夜深光浩然稍轉西廊下漸滿南牕前况
是綠蕪地復茲清露天落葉聲策策驚鳥影翩翩棲禽
尚不穩愁人安可眠

朱陳邨

徐州古豐縣有邨曰朱陳去縣百餘里桑麻青氛氳機

梭聲札札牛驢走紆紆女汲澗中水男採山上薪縣遠
官事少山深人俗淳有財不行商有丁不入軍家家守
村業頭白不出門生爲陳邨民死爲陳邨塵田中老與
幼相見何欣欣一村惟兩姓世世爲婚姻親疎居有族
少長游有群黃雞與白酒歡會不隔旬生者不遠別嫁
娶先近隣死者不遠葬墳墓多遶村既安生與死不苦
形與神所以多壽考往往見元孫我生禮義鄉小小孤
且貧徒學辨是非祇自取辛勤世法貴名教士人重冠
婚以此自桎梏信爲大謬人十歲解讀書十五能屬文
二十舉秀才三十爲諫臣下有妻子累上有君親恩承
家與事國望此不肖身憶昨旅游初迨今十五春孤舟

三適楚羸馬四經秦晝行有饑色夜寢無安魂東西不
暫住來往若浮雲離亂失故鄉骨肉多散分江南與江
北各有平生親平生終日別近者隔年聞朝憂卧至暮
夕哭坐達晨悲苦燒心曲愁霜侵鬢根一生苦如此長
羨陳邨民

歎老

晨興照青鏡形影兩寂寞少年辭我去白髮隨梳落萬
化成於漸漸哀看不覺但恐鏡中顏今朝老於昨人年
少滿百不得長歡樂誰謂天地心千齡與龜鶴吾聞善
醫者今古稱扁鵲萬病皆可治惟無治老藥

我有一握髮梳理何稠直昔似元雲光今如素絲色匣

中有舊鏡欲照先歎息自從頭白來不欲明磨拭鴟頭
與鶴頸至老常如墨獨有人髻毛不得終身黑
前年種桃核今歲成花樹去歲新嬰兒今年已學步但
驚物長成不覺身衰暮去矣欲何如少年留不住因書
今日意徧寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從邨南還新與兄弟別離
襟淚猶濕迴馬嘶未歇欲歸一室坐天陰多無月夜長
火消盡歲暮雨凝結寂寞滿爐灰飄零上堦雪對雪畫
寒灰殘燈明復滅灰死如我心雪白如我髮所遇皆如
此頃刻堪愁絕迴念入坐忘轉憂作禪悅平生洗心法

正為今宵設

同友人尋澗花

聞有澗底花貰得村中酒與君來較遲已逢搖落後臨
觴有遺恨悵望空溪口記取花發時期君重攜手我生
日日老春色年年有且作來歲期未知身健否

別行簡

時行簡辟盧坦
劍南東川府

漠漠病眼花星星愁髻雪筋骸已衰憊形影仍分訣梓
州二千里劍門五六月豈是遠行時火雲燒棧熱何言
巾上淚乃是腸中血念此早歸來莫作經年別

感鏡

美人與我別留鏡在匣中自從花顏去秋水無芙蓉經

年不開匣紅塵覆青銅今朝一拂拭自顧顛顛容照罷
重惆悵背後雙盤龍

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生
似行客兩足無停步日日進前程前程幾多路兵刀與
水火盡可違之去唯有老到來人間無避處感時良為
已獨倚池南樹今日送春心心如別親故

初出藍田路作

停驂問前路路在秋雲裏蒼蒼縣南道去途從此始絕
頂忽盤上衆山皆下視下視千萬峰峰頭如浪起朝經

韓公坂夕次藍橋水潯陽僅四千始行七十里人煩馬
蹄踰勞苦已如此

仙娥峰下作

我為東南行始登商山道商山無數峰最愛仙娥好差
叅樹若挿匝匝雲如抱渴望寒玉泉香聞紫芝草青崖
屏削碧白石床鋪綺向無如此物安足留四皓感彼私
自問歸山何不早可能塵土中還隨衆人老

寄微之

江州望通州天涯與地末有山萬丈高有江千里濶間
之以雲霧飛鳥不可越誰知千古險為我二人設通州
君初到鬱鬱愁如結江州我方去迢迢行未歇道路日

乖隔音信日斷絕因風欲寄語地遠聲不徹生當復相逢死當從此別

君遊襄陽日我在長安住君今在通州我過襄陽去襄陽九里郭樓雉連雲樹顧此稍依依是君舊遊處蒼茫蒹葭水中有潯陽路此去更相思江西少親故

去國日已遠喜逢物似人如何含此意江上坐思君有如河嶽氣相合方氛氲狂風吹中絕兩處成孤雲風迴終有時雲合豈無因努力各自愛窮通我爾身

御定全唐詩錄卷第六十



